

ORDO LI.

G R A M I N A.

T R I T I C V M.

LINN. *Syst. veg.* p. 108. *Gen. pl.* p. 40.

539.

Pharm. TRITICVM vel TRITICI Semen.

Triticum hybernum; calycibus quadrifloris ventricosis laeuis imbricatis submuticis LINN. *Sp. pl.* p. 126. *Triticum hybernum*, aristis carens c. b. *Triticum* β , loculis quadrifloris glabris, basi subhirsutis glumis submuticis HALL. in *Comm. soc. sc. Gotting.* 1774. p. 7. *Icon:* TOURN. *Instit. rei herb.* tab. 292. HALL. *I. c. tab. 1. fig. 2.* vbi spica modo partialis depingitur. Annum. Procerius, perfectius. Pluribus culmis emergit floribus plerisque fertilibus.

Triticum aestiuum; calycibus quadrifloris ventricosis glabris imbricatis aristatis LINN. *Spec. pl.* p. 126. *Triticum aestiuum* c. b. *Triticum* α . loculis quadrifloris basi subhirsutis, glumis exterioribus floralibus aristatis HALL. *Comm. soc. sc. Gotting.*

Gotting. 1774. p. 5. Icon: TOURN. *Inst. rei herb.*
 tab. 293. HALL. *loc. cit. fig. 1.* vbi modo spicula.
 Annuum. Macilentum et debilius praecedente
 est. Culmos fert pauciores et flores pauciores
 perficit.

Ad HALLERI iudicium varietate modo, non spe-
 cie, differt inter se vtrumque, vt ex dictis intelligitur.
 Nempe aristae non omni tempore, nec omni loco
 in spica adsunt et longitudine vario gradu disre-
 pent. Solum macrius, negligentior cultus, et
 satio seminum valde recentium prouentui aristar-
 rum fauere solet. Praeter culmorum et aristarum
 dictum respectum, magnitudo spicularum et gra-
 norum, color culmorum, glumarum et granorum,
 hirsuties spicularum rel. in Triticis varietates effor-
 mant multiplices; vnde ingens diuersorum nomi-
 num vis, a loco culturae praeprimis desumta.
 Ratio horum discriminum in solo et climate
 quaerenda videtur. De varietatum Tritici discri-
 mine multiplici cum fructu leguntur obserua-
 tiones MANETTI (*Delle Specie diverse di Frumento et di*
Pane p. 34 sqq.) et HALLERI (*l. c.*). Omitto alias
 Linneanas species, vtique hinc inde oeconomis
 acceptas, nec reiiciendas, dum suppetunt, ex foro
 medico

medio, ut Triticum turgidum, monococcum, Speltam, quae proxime dicta vna cum T. hyberno et aestiuo prae reliquis cultu et vsu frequentatur.

Accidit Tritico, quod aliis iamiam suetissimis cerealibus, imo bene multis plantis culinaribus, quod inter quotidiana, quae indulgent hominibus commoda, et propagandi perficiendi et in ampliores usus illa transferendi molimina, originis primae sive patriae memoria interciderit. Eruere istam ex veterum monumentis sub ista nominum, quibus frumenta insigniuerentur, inconstantia et a nostris dissimilitudine et characterum neglectu vix certe vacat. Triticum Πυρος Graecorum esse creditur. In Babylonia sive terra inter Tigrim et Euphratem sita Triticum et Hordeum sponte prouenire BEROSI fragmentum (ex ALEXANDRO POLYHISTORE descriptum a SYNCELLO *Chronograph.* p. 28.) memoriae prodidit, quod effatum ill. HEYNE (*Progr. de frugum et panificii initis in Opusc. vol. I. p. 341. 377.*) multis speciosis argumentis ornatuit. DIODORUS (*I. 14.*) vtrumque cereale tanquam spontaneum ad Aegyptum longe minus probabili fulcro innixus refert. Nostro demum tempore omnium mentes mirifice perculit, quod LINNEUS (*Anoen.*

Appar. medic. Vol. V.

X

acad.

acad. vol. 7. p. 453.) ex HEINZELMANNI, tam historici quam botanici, pugillaribus Florae Samariensis narraret, istum in Sibiria australi siue campus Baschkirorum Triticum aestuum et Hordeum distichum inter sponte crescentes stirpes reperisse, et quod ipse LINNEUS huic narrationi robur variis argumentis addere tentaret. Nuperrime adeo Triticum et Hordeum spontaneum in Tauria variis locis montosis praecipue inter Carassubazare et Allmetschet, item ad originem fluuii Buryltsch inuentum fertur (*Description physique de la Contrée de la Tauride*, p. 190.). Nihil vero prohibet, quin suspicemur, vtraque in terra prouenisse frumenta ista ex semine post culturam vel breuiori vel longiori interuallo antea ibidem administratam, dein vero neglectam, superstite et sponte sua postlimino sese propagante (Conf. PALLAS n. nord. *Beytr. zur — Naturg.* vol. 2. p. 357.). Nam cerealia, qualia iam comparent, sub vilioris et vulgaris graminis larua delituisse, formam autem cultus, sensim per aetates magis perfecti, adiumento mutasse verisimilitudine omni caret. Id quum de speciebus diuersis valet, tum vel maxime cadit ridicula hypothesis ante triginta et quod excedit annos reccpta, fertilitate soli et coeli beneficio vilius frumentum

mentum in nobilius posse transmutari, e. c. Secale in Triticum, Auenam in Secale, macriori autem solo et inclementiori coelo praestantius frumentum in vilius degenerascere e. c. Secale in Hordeum, Hordeum in Lolium vel Bromum, quod si verum esset, vnum genus plantarum transmutaretur in alterum necesse foret, quae tamen quantum forma praecipue floris fructusque partim modo quo flores inferuntur, differant, quilibet attentior perspicit (Cf. LINN. *Diff. de transmut. frument.* in *Amoen. acad.* vol. 5. p. 106.). Ratio contra ea alienae segetis ea est, quod vel agro antea inhaeserit vel admixta frumento iam ferendo extiterit.

Triticum ex Sicilia in reliquas terras occidentales primo translatum esse, iusta suspicio est (HEYNE l. c. p. 355.). Colitur iam in omni Europa tam calidiori, ut Lusitania, quam frigidiori, ut Suecia, Russia. Viget quoque in Persia, terra Yemen, aliisque regionibus fertilibus, in Aegypto in Tingitanam terram usque, Graecia, item America septentrionali et in Chili et Peruua. Molliora grana sunt frigidiorum regionum, duriora et lapidea fere calidorum, quae et optimum Triticum exhibent.

X 2

Saep^e

Saepe Triticum morbis quibusdam corrum-pitur, in quorum natura expiscanda et praesidiis eosdem praecauendi et tollendi eruendis recentiores egregie defudarunt, praecipue cl. TILLET (*Diff. sur la cause qui corrompt les grains de bled dans les épis*) et TESSIER (*Traité des maladies des grains*, p. 199 *sqq.* Conf. et IDEM in *Hist. de la Soc. R. de Med. de Paris*, vol. 4. p. 364 *sqq.* vbi enucleatos morbos cerealium enumerat). Et horum quidem unus puluere rubiginoso foliis, culmo et glumis infestus est, sensim in granum ipsum saeiente, Rubigo dici solet, (Gallis la Rouille, cuius effigies conspicitur in TESSIER *Traité l. c. tab. ad p. 215.*). Reliqui, scilicet Caries, quae dignoscitur granis griseis puluere nigro repletis (la Carie, *l. c. tab. ad p. 294.*), et Vstilago, quae loco granorum glebas fuliginosas cum paucis glumarum albidis reliquiis in spicis gerit (Le Charbon *l. c. tab. ad p. 299.* Conf. egregias de hac obseruationes cl. BJERKANDER in *K. Vet. Ac. Handl.* 1775. p. 317 *sqq.*), quibus et a cl. TILLET Rachitis addita, granum ipsum praecipue perdunt. Hinc non solum insigne decrementum lucrum ex granis et culmis Tritici patitur, sed farina panisque in valetudinis daminum vitiatur, ita ut haec mala fermentationi panis aduersa sint,

et

et vſtilago cephalaeas, diarrhoeam, conuulsiones
creauerit.

Sunt et varia insecta, quae Tritico cladem,
dum in agris versatur, laruarum forma afferunt.
Etenim quaedam depascunt virentem eius herbam,
vt Tipula oleracea (BJERKANDER *Vet. Acad. Handl.*
1779. p. 161.), Elater segetis (ID. l. c. p. 285.),
quae et alia frumenta eodem modo deſtruunt;
alia excauant grana Tritici, vt Ichneumon culpa-
torius et Phalaena Tritiei (ID. l. c. 1778. p. 335.).
Collecta vero fegetum grana ſaepe bonam partem
Curculioni granario et Phalaenae granellae (*Faun.*
Suec. p. 363.) in praedam cedunt (LINN. in *Vet.*
Acad. Handl. 1750. p. 180. WILCKE l. c. 1776. p.
274 *sqq.*). Farina tandem consumitur Acaro fa-
rinae (MODEER in *Vet. Acad. Handl.* 1774. p. 68
sqq.), Tenebrione Molitore, Phalaena farinali.
Quin ne panis quidem ab hisce infestis hospitibus
tutus est, quippe cui idem Tenebrio, Ptinus Fur,
et hinc inde Blatta orientalis insidias ſtruit. Hisce
ſi addimus morbos frumentorum; errores agricul-
ture, qui multis locis obtinent; iniurias frumen-
tis in agris allatas tempeſtatis inclem̄tia, qua-
drupedum variorum, vt glirium, talparum, crice-
torum, cuniculis vel voracitate, item auium, li-

macum, gryllorum subinde depraedatione; damna porro, quae ex luxurie stirpium aduentitarum exsurgunt, quorundam pertinent Agrostema Githago, Chrysanthemum segetum, Sinapis arvensis, Papaver Rhoeas, Convolvulus arvensis, Melampyrum arvense, Farfara, Vicia Cracca, Lolium temulentum, Triticum repens, Bromus arvensis, Avena fatua, Equisetum arvense, rel.; iacturam granorum sub ipsa messe contingentem; rapinas glirium in granariis; communionem lucri, quam ipsi pagani, molitores, pistores fraude sibi vindicant; facilem granorum et farinae corruptelam a situ; tributum denique principi foluendum: nae adstupendum est mirae naturae fertilitati, quae sub tam insigni tamque multiplicis generis iactura tamen hominibus tantum erogat, ut frumenta omnium reliquorum alimentorum valore censeantur vilissimum, eorumque ad pretium reliquarum rerum pretia plerumque sese accommodent.

SEmen ovato oblongum est, longitudine sequilineae, fursum gibbosum, deorsum fulco longitudinali exaratum, antice cicatrice obliqua, postice villo exiguo distinctum, cortice flavescente, intra quem medulla s. farina albissima. — Colligitur

gitur ut quodlibet aliud cereale; scilicet secis falce culmis et in fasces colligatis hi in horreum transferuntur, vbi, quod suetissimum, per flagella, vel et calcando per iumenta, vel molendini ope exutiuntur grana ex suis spicis, dein agitantur vel molis ventosis vibrantur, ut a glumis et peregrinis seminibus, vel iusto leuioribus granis liberentur.

Duplicis est naturae farina triticea, vna eius pars accedit ad indolem animalem, glutinosa dicenda; altera ad vegetabilem, amylacea. Glutinosa pars collam glutinandi vi refert, aqua non soluitur, putredine correpta foetet instar casei antiqui vel cadaueris, multum alcali volatilis continet. Quod cl. BECCARII inuentum iam a. 1728. factum (Vid. *Instit. Bonon. Comment. tom. 2. P. 1. p. 122 sqq.*), confirmatum serius a multis aliis, cll. MODEL (*Forts. sein. chym. Nebenstund. p. 62.*), KESSELMAYER (*Quorundam veget. princip. nutriend. Argent. 1759.*), PARMENTIER (*Experiences et reflexions relatives à l'analyse du Bled, p. 59 sqq.*) aliisque. Huius vnciae duae cum quinque drachmis in libris duabus farinae triticeae continentur, et obtinetur lavando farinam ope aquae tepidae, affusae per vices, donec

donec non amplius lactescat; reliquum est gluten subelasticum pallide brunum (MODEL I.c.). Altera pars siue amylacea post fermentationem acepsit, cum alcali efferuescit et rufat tincturam Violarum, aquam modo lacteam reddit nisi cum ea coquatur, quo ipso in pultem viscidam abit. Facile haec a priori segregatur maceratione granorum integrorum vel rudius comminutorum in aqua ad emolitionem usque. Qua facta sacculo linteo massa includitur et calcatione pedum intra lacum ligneum aqua repletum et infra epistomis suis instrutum et desusa affusaque per vices aqua exprimitur amyolum, donec aqua defluens non amplius lactescat. Aqua amylo foeta et alio vase excepta intra nycthemerum subsidere sinit amyolum et postquam clara evaserit, per laterales canaliculos demittitur, amyolum autem ter vel quater iterum eluitur noua aqua affusa, ut odor ingratus pereat. Tandem separata superiori amylī parte, quae grisea est, reliqua vel expressione repetita linteī rudioris pluries conduplicati vel super cribri specie paullum exsiccatur, ut in portiones quadratas diffecari queat, dein ulterius solis vel aëris perflantis vel conclusis calefacti vi, sicandas, tum diffringitur (Conf. *Fabrique de l'amidon par DUHAMEL DE MON-*

CEAU

CEAU 1772.). Foecula similis ex Spelta eruitur; quam Hordeum largitur flauida est; obtinetur et ex seminibus Fagopyri, Hippocastani, stirpium leguminosarum rel. item radicibus variis, ut Ari, Bryoniae, Tritici repentis, Filipendulae, Lathyri tuberosi, Colchici, Sclani tuberosi rel.

Anylum oeconomicis potius usibus, quam medicis, inseruit. Ad linteas enim post lotionem, item texta varia ex gossypio vel lino teneriori parata, firmando, ad conglutinandos libros et chartas Iusorias, ad fercula varia culinarum et panes pistorum dulciorum, adhibetur. Contritum in tenuissimum puluerem capillis pessimo luxu inspergitur, nec sine omni valetudinis offensa, tum praecipue si variis additamentis coloris vel odoris causa factis, ut cerussa, calce, oleis odoris, corrupta fuerit (*REUSS Untersuch. der Eigenschaften und Wirkungen eines ächten und verschönten Punders*, 1781.). Nominatim nocet iis, qui achoribus capitis laborant, ut qui intempestive inde exsiccantur. Vulgo et contra intertriginem pusionum inguinibus vel axillis applicatur; sed consuetudine haud laudanda, quum inde saepe scabies exorta fuerit (*LINN. Amoen. vol. 5. p. 95.*). Clysmate exceptum

inuolviendo diarrhoeas et dysenterias lenit. Recipiunt illud species diatragacanthae frigidae et inspergitur pastis in officinis ne modulis agglutinentur, exemplo pastae Glycyrrhizae, Althaeae. Nebulae (Oblaten) quoque inde parantur, quarum utilitas ad obsignandas litteras huius quidem non loci est, sed ista omnino, qua pulueres palato displicentes oboluunt, quo fine non sufficit eas emollire aqua, sed ut tanto facilius bolus deglutiatitur, nec crepans stimulo ingratissimo offendat, gelatina vel Robe grato eam oblinire antea conuenit. — Furfures et aqua acidiuscula post praeparationem amyli residua saginandis suibus et bobus valet.

In polline, in quem molendini ope grana rediguntur, reiectis furfuribus vtraque modo dicta et glutinosa et amylacea pars iungitur. Huius farinae pro pane summa dignitas est. Quo autem glutinosa viscidaque pars attenuetur, haec cum altera intime sese commisceat, et vtraque facile tam a ventriculo digeratur, quam humoribus nostris recipiatur et melius nutriat, nec flatulentia generetur: fermentatione praeuia farinae aqua humectatae beneque subactae opus est. Hinc qui Triticum crudum auidius comedunt infarto et tumido

tumido abdomine languent et hydropem contra-
hunc (VAN SWIETEN *Comment.* vol. 4. p. 108.). Panis azymus, h. e. sine fermentatione paratus, aluum adstringit. Fermentationem adiuuat fermentum, quo sine heic fex cereuisiae commoda. Succedit tempestive, ne ultra limitem iustum resoluatur farina, coctio, sub qua panis porosus evadit. In australioribus regionibus panis triticeus vulgatissimus, in frigidioribus fecalinus. Nec rara farinae triticeae et fecalinae pro pane parando sub varia proportione miscela, pro cuius diuersitate color vel albidior vel magis griseus, qui in mere triticeo omnino albus est. Magis nutrit triticeus, quam ullus aliis, ob lentorem vero, qui ineft, aluum in debilioribus stipat, et acres in primis viis vel profundius haerentes stimulos blande obvoluit; hinc in profluuiis aluinis magis, quam reliquae species panis, conduceit. Acidum quoque ob alcalinam naturam frangendo hypochondriacis et hystericis salubrior est pane fecalino. Panis bis coctus omni humiditate priuatus est, hinc diutius feruari absque corruptela potest, et, quoniam in arctius volumen nutrientem partem contractam continet, reliquis panis speciebus nutriendi potentia antistat. Tam vero facile concoquitur a ventriculo,

triculo, vt et infantibus recens natis nutrimentum salutare loco lactis nutricis praestet, modo bene aqua coctus per cribrum vel linteum subtile transfigatur; liquidum, quod transit, frigore in gelatinam densatur, tempore autem deliquescit, huiusque cochlearia duo vel tria cum cochleari vno lactis et tantillo sacchari mixta infanti per portiones cochleari paruo ingeritur (*Zürch. med. Magaz. ann. 2. p. 569.*). Maxime vero nocent hisce pultes istae ex farina coctae acore, in quem degenerant, glutinosa natura sua, quibus vitiis grauant ventriculum, glandulas mesenterii obstruunt, sub intumescentia abdominis flatulenta maciem reliqui corporis cident, et rachitidi opportunitatem praebent. Ex pane biscocto iuscula quoque parantur in febribus commoda, acore et saccharo gratiora; et, dum vires refocillandae, vini tantillo permiscenda.

Pane ex frumentis etiam si quotidie vtamur, fastidium tamen non parit. Et vix aliud alimenti genus exstat, quod hocce salubritate aequet, siue animalis siue vegetabilis census sit; quicquid cl. LINGUET (in *Annales politiques civiles et litteraires du dixhuitième Siecle*, tom. 5. n. 39. p. 429. cum qua disputatione confer responcionem cl. TISSOR, *Lettre à Mr.*

à Mr. HIRZEL sur le bled et le pain 1779) ingenii potius iudicrio, quam veri filo ductus contradixerit. Facillime bene coctus digeritur, egregie et cum stabilitate nutrit, nec nisi vitio frumenti ipsius vel panificii vel copia nimia vel calide ingestus nocet. Nec conductit eius vnicce usum acquiescere; nam solo pane vesci in connubio aquae per plures dies poenae loco esse constat. Studio deditaque opera cum pane vel solo cum aqua ingestu, vel cum parca aliis cibi quantitate in semet ipse instituit multa experimenta cl. STARK (*Works consisting of clinical and anatomical Observations, Lond. 1788.* cuius libri versio German. modo coram est, *Klin. u. anatom. Bemerkungen nebst diätetischen Versuchen 1789.*), ut eiusdem in valetudinem vis patesceret, horumque singulis plures continuos dies infumisit. Pane solo largius cum aqua capto (l. v. p. 136 sqq.), opus fuit integrum diei destinatam quantitatem vniarum viginti, triginta vel triginta octo, in plures portiones diuisam edere, quumi alias ructus subinde, flatus, nausea, appetitus defectus incideret, opus quoque fuit copioso potu, ne sitis molesta esset. Peius res cessit iuncto facchari largiori connubio, quod ipsum neque cibi cupiditatem sedauit, sed famem potius insignem

excita-

excitauit, vlcuscula oris generauit, gingiuas inflammauit et intumescere fecit, variaque resoluti sanguinis indicia produxit (*l.c. p. 141.*). Similia varia ex melle contigerunt (*l.c. p. 208 sqq. p. 216.*) Inter prandia vtiliter iungitur panis vel interseritur ferculis pinguibus, vt cuius ope ob mucilaginosam naturam pinguedinis cum aquosis miscela adiuuat; aromatum quoque vim frangit, et corruptelam ex victu animali nimis copioso oriundam temperat. In regionibus, quibus nostra frumenta desunt, indigentiae prouidit benefica natura alii prouentibus vegetabilibus, Oryza, Zea, Milio, Sorgho, Artocarpo, Sagu, radicibus esculentis, Solani tuberosi, Dioscoreae, Iatrophae Manihot, Lichene Islandico &c. Quibus dirius fatum contigit vel situ regionum nimis septentrionali vel annonae charitate, hos confugere coëgit dura necessitas ad cerealium partes minus nutritias, vt id, quod post cereuifiae coctionem residuum, vel spicas granis maturis cassas vel culmos, quibus contritis admiscetur pauxillum probae farinae frumentaceae, item ad magis adhuc a nostra natura aliena, vti medullam Scirpi lacustris, semina Elymi arenarii, radices Menyanthis trifoliatae, Callae palustris, cortices varias arborum, Pini sylvestris, Betulae

albae

albae &c. Saltim Fennones subinde hisce alere vitam coguntur (Vid. HELLENII *Diss. om Finſka Allmogens Nödbröd, Åbo 1782.*).

Non huius loci est percensere omnia panis ex Tritico vel aliis cerealibus cocti nomina ex forma, farinae subtilitate diuersa, additamento vel tractatione varia petita. Taceo quoque Italorum artificia varia, quae et in Germania nominatim Norimbergenses probe imitati sunt, tractandi farinam triticeam cum aqua subactam, ut inde pastas varias, quas Vermicelli (Nudeln), Macaroni, Taglioni, Festuciae, Andarini &c. vocant, condant; quae ipsa post exsiccationem diu seruari possunt, et ad varia fercula extemporanea commoda sunt (De hisce cf. cl. MALOUIN *Description et details des arts du Meunier du Vermicellier et du Boulanger.*).

Farinae triticeae | insuper vsum multiplicem in culinis pro placentis, iusculis &c. quis ignorat? Farina rudius molae ope comminuta Alica (Germ. Gries) vocatur. Sunt et huius plures species teneriores et rudiores, optima ista, quae ex parte corculo proxima elicetur. In specie, quam coram habeo, quasdam particulas vndique albissimas, deprehendo, in aliis vestigia corticis conspicuntur.

Farina

Farina eximia inde parari potest, item in culinis
puls, iuscula, placenta. — Supra speciei Sagu,
quam Mauri ex farina Tritici parant, memini
(*Appar. med. vol. 5. p. 19.*).

Vt aliae farinae haec ipsa siccata probe extus
scopo discutiendi tumoribus oedematosis et erysi-
pelatosis applicatur. Cocta in cataplasma emollit
et suppurationem ciet. Domesticum quoque est
ad maturationem abscessuum accelerandam, sicut in
emplastro ex farina cum melle subacta.

Mica panis triticei siue pulpa mollis, ex crusta
enucleata, scite acria quaedam medicamina exci-
piuntur, quorum vis lente modo euolui debet.
Exemplum praebent pilulae sic dictae magnae HOFF-
MANNI, quae mercurium sublimatum corrosium
aqua solutum comprehendunt, quod vehiculum
auertit multa incommoda a solutione liquida per
os capta alias emergentia; item cataplasma a cl.
DUNCAN (*Medical Cases, ed. 3. p. 198.*) in tinea
capitis tentatum, cui pariter inest acre istud mer-
curiale praeparatum. Visitatius est, micam panis
lacte in cataplasma coctam maturandis abscessibus
tepidè applicare, quod ipsum longe praferendum
emplastris ad hunc finem alias commendatis. Si
flimulo

stimulo opus est, addi isti potest Crocus, Mel, Gummi Ammoniacum, Cepa et similia. — *Deco-*
Etum album SYDENHAMI, quod auctori in dysenteria
 (nam aliud etiam usurpabat) placebat, vna cum
 cornu cerui micam panis albissimi recipiebat.

Furfures calide applicati oedemata pedum diffi-
 pant. Addi solent pediluuiis calidis emolliendi
 scopo. Cocti cum aqua emolliendo in clysmate
 laxant.

Supereft, vt de Tritici ad cereuifiam vſu
 moneam, cui multis locis indulgent. Quum vero
 cereuifia hordeacea longe vulgatior fit: aptius,
 quae ad cereuifiae generalia pro instituti ratione
 fpeſtant, capite Hordei commemorabuntur. Co-
 quitur ex Tritico vel solo vel in connubio Hordei
 cereuifia, vel addito Lupulo vel eo omisso. Bene
 quidem triticea cereuifia nutrit, sed facile fla-
 tus generat magisque, quam cereuifia ex Hordeo,
 in acidum inclinat, lotium pellit efficacius minus-
 que calida est, quam hordeacea saltim lupulata.
 In Germania inter triticeas cereuifias clarent
 ista Breyhan dicta, Gosa Goslarientum, Duckstein
 Brunſuicensium aliaeque; Angli quoque cereuifiam
 Ale inde parant.

540.

Pharm. GRAMINIS Radix.

Triticum repens; calycibus quadrifloris subulatis acuminatis, foliis planis LINN. *Syst. veg.* p. 109. *Triticum repens*, glumis mucronatis aristatisue, aristis spicula brevioribus SCHREB. *Beschr. u. Abbild. d. Grüfer*, p. 24. Gramen caninum aruense f. Gramen Dioscoridis c. v. Gramen loliaceum radice repente, f. gramen officinarum MONTI *Catal. stirp. Bonon. prodr.* p. 41. Mox α , muticum: MONTI icon 25. vbi fistitur modo spicula solitaria; mox β , aristatum, cuius icon in *Fl. Dan.* tab. 748. Vtrunque cum aliis multis varietatibus intermediis describit et depingit SCHREBER *I. c.* tab. 26. Gramen perenne ad sepes crebrum, pestis quoque vulgaris agrorum et hortorum, vtpote quum vicinas plantas radicum luxurie suffocet, vt fieri a stirpibus radice repente solet.

Incaute confundunt illud, nominatim muticum, cum Lolio perenni L. sed in hoc proxime dicto calyx monophyllus nec diphyllus est, et spiculae latus, non superficiem, rachi intermediae obuerunt. Non vbiuis radix Graminis officinam

rum

rum a dicto Tritico colligitur, certe hoc fit multis Germaniae locis, item in Suecia. Alibi Panicum dactylon L. f. Panicum dactylon radice repente f. officinarum SCHEUCHZ. loco prioris in usum vertitur; ut in Italia (teste SEGUERO apud LINN. *Diff. Obs. mat. med.* p. 6.), in Gallia, si fides iconi cl. REGNAULT in *Botanique*, item in Marchia Brandenburgica (LÖSECKE *auserl. Arzn.* ed. 4. p. 50.). Crassior adeo et dulcior est haecce radix, quam altera (*i. e.*). Sed nec defraudanda altera suo pretio est.

RADIX subramosa, unde sese horizontaliter dispergens, filiformis, culmum frumenti, dum recentis est, crassitie aequans, longissima, glabra, geniculata, geniculis fibrosis, ex flavo alba. Sapor tam recentis quam siccae subdulcis.

Libra una harum radieum circiter vncias quinque succi expressi erogat, qui facile fermentationem subit, qua finita liquor vinosus dulcis, non tamen palato placens emergit. Continuata fermentatione et fermento addito aescit (HOFFMANN in CRELLS *Beytr. zu den chym. Ann.* vol. 3. p. 124.). Concisa et contusa radix cocta et fermento mista spiritum vini exhibit, spiritui vini non cedens. Cereuisiae pariter species inde redundat (IDEM). —

Foecula inde emergens soluitur aqua bulliente, quae dum resfixerit gelatinosam substantiam exhibet (PARMENTIER *sur les vegetaux à suppleer en temps de disette*). Succus elicitus dulcem quidem saporem prae se fert, sed in solidum saccharum non concrescit (MARCGRAF *chym. Schrift.* vol. 2. p. 85.). Acido nitri tractatus acidum sacchari suppeditat (HOFFM. *l. c.* p. 126.). Saccharinis pariter ac nutrientibus particulis instrui hancce radicem dicta declarant.

Ad alenda pecora, boues praecipue, radicem aptam esse experientia constitit, quum contra ea oeconomi incurii nonnisi comburere ex agris euulsam sciant. Abluenda scilicet radix, siccanda, dein concisa postquam fuerit, aqua calida humectanda, vel cum stramine conciso vel furfuribus vel aliis commiscenda est. Pro pane quoque hominibus sub annonae caritate commendata radix siccata, mola contrita et farinae pauxillo combinata (LINN. *Skänska resa* p. 35. BERGIUS *Rön om Spanmåls bristens ärfattning medelst Quickrot*, Stockh. 1757. 4.). Hinc vtut infestum gramen hoc locis alienis crescens, tam foeni caufa, quod bis secari per annum potest, quam radicis, solo molliori et fertiliori

fertiliori vt cultura adiuuetur, etiam atque etiam suadendum (BENGT BERGIUS *Tal om Svenska Ang-skötseln*, p. 65.). Et haec concisa recente radice facile succedit (*l.c.* item BLOM in *Vet. Acad. Handl.* 1782. p. 244.).

Sed vi blande resolente, aperiente et demulcente iam dudum in re medica inclaruit. Hinc ptifana inde parata pro potu ordinario in febribus acutis familiaris, in primis apud Gallos est. In obstructionibus viscerum referandis haud mediocre remedium est, et nominatim in ea hepatis magni eam fecit BOERHAAVIUS (HALL. in *Hist. stirp. Helv.* n. 1426.). Nec defunt recentiorum de efficacia hocce in morbo praeconia (KNIPHOF *Diss. de Gramine leuidensi et praecellentissimo*, p. 16.). In ictero periodico a calculis felleis profuit decoctum, etsi non sine aliorum commodorum connubio, secedentibus dejectionibus viridescentibus et lapillis quasi comminutis (SEIP *Diss. Sylloge Obff.* in *TOD. Bibl. vol. 9.* p. 478.). Eundem effectum in solvendo calculo biliario expertus est LÖSECKE (*l.c.* p. 251.). Intermittentibus febribus Hafniae vigenibus egregie decoctum subuenit vi sua digestiua (TODE *Bibl. tom. 5.* p. 136.). Ita sanavit deco-

Y 3

ctum

ctum sale polychresto et foliis Sennae stimulatum virum habitus mali et alui torpidae, iam per annum quartana contra corticem Peruuianum rebelli laborantem (id. in *Bibl.* sed excidit locus). Nec minus in pituita, pulmones grauante et tussim et asthma excitante, prodest. Praeter decocti saturati formam, hodie quam maxime placet

EXTRACTVM f. MELLIGO GRAMINIS. Paratur inspissatione succi expressi. In hunc finem non conducunt vasa cuprea vel ferrea, quum inde semper aliquid soluatur, sed inspissatio fieri debet in vase vitro. Si haec continuatur ad crassitatem mellis, mel magnopere refert, et extractum in ampullis vitreis seruatum deponit post aliquot hebdomades materiem grumosam faccharinam aqua facile solubilem (HERMBSTÄDR in cl. SELLE *Beitr. z. Natur- u. Arzneywiss.* vol. 3. p. 30 sq.).

Recipient porro hanc radicem RADICES QUINQUE APERIENTES MINORES, item inter tot alia SYRUPUS ALTHAEEAE FERNELII.

SECALE.

S E C A L E.

LINN. *Syst. veg.* p. 107. *Gen. pl.* p. 39.

§ 41.

Pharm. SECALE v. SECALIS *Semen.*

Secale cereale; glumiarum ciliis scabris LINN. *Spec.*
pl. p. 124. a. Secale hybernum vel maius c. b.
 β. Secale vernum s. minus id. Discriumen utriusque varietatis in statura diuersa consistit, posteriorius quoque strigosius est. Icon: REGNAULT *Botan.* Le Seigle. Gramen annum. Altissimum et firmissimum inter cerealia, ut sex ad decem pedes aliquando attingat.

Coniecturas de patria Secalis, agens de Tritico, iam in medium protuli. In Creta spontaneum esse, uno verbo in *Systemate veg.* (l. c.) LINNEUS adiecit. Passim, sed rarius in deserto Cumano solo pingui nec non inter fluuios Don et Wolga, ubi nunquam aratro usi sunt, subinde Secale offenditur; sed ex raritate et situ probabile fit, emersisse illud ex granis casu delapsis (PALLAS *N. nord.* *Beyträg.* z. — *Naturgesch. u. Oekon.* vol. 2. p. 359.).

Y 4

Cultura

Cultura huius exercetur abundantissime regionibus praecipue Europae frigidioribus, parcis in calidioribus. Subinde mixtim cum Tritico feritur, unde imbecilliores Tritici culmi sustinentur, et panis materies tanto praestantior messe colligitur.

Secale, cuius PLINIUS (*Hist. nat. lib. 18. cap. 16.*) meminit, videtur frumentum a nostro diuersum esse; etenim describit illud nigrum amarum, ad arcendam modo famem utile et, etiamsi farre mixtum, ventri ingratissimum.

Praeter Rubiginem (Rouille; TESSIER *Traité des maladies des graines, p. 19.*), quam cum aliis frumentis communem habet, Secale perniciose valde alio morbo tentatur, Clavo fecalino, Secali corniculato s. cornuto, Secali luxuriante, (Gall. Ergot, Blé cornu, Germ. Mutterkorn, Kornzapfen, Blekingis in Suecia Mjöldrufvor, aliis ibidem Mjöldryor, item Mjöldrygor, Mjölökör v. Bockhörn). In hoc excrescentia una, saepe plures ad sex vel duodecim supraque usque, in eadem spica conspiciuntur, subteres medio nonnihil crassior, aliquantum recurvata apice mox obtuso mox acuto, solidioris frumento compaginis, saepe interne cauis exiguis pertusa, extus profunde violacea, intrinsecus

cus alba, magnitudinis subinde minoris, quam in grano fecalino ipso, subinde vero longitudinis pollicis vnius ad sesquialterum, latitudinis vnius vel duarum linearum. Facile dignoscitur effigie (in TESSIER *l.c.* tab. ad p. 188. et alia ab eo praefixa in *Mem. de la Soc. med. de Paris, tom. I. tab. 4.*). Nonnunquam et alia grama eodem infestantur, ut Phalaris Canariensis, Auena elatior, Festuca fluitans, Lolium temulentum, Triticum repens, Phleum pratense et alia plura, imo Hordeum et Auena, quin Triticum (TESSIER *l.c.* p. 29.), sed praecipue huic labi Secale obnoxium est. Quo humidior tempesta, eo vberior eius prouentus. De eius origine insigne fententiarum diuortium. MONETA (in TISSOTI *Epistolis medico-pract. edit. 2.* p. 486.) iudice nihil est, quam luxurians granum s. giganteum. OTTONI A MÜNCHHAUSEN verosimile visum, fungi speciem seu Clauariam esse. Sunt alii, qui ex punctura infecti congestionem humorum ibidem contigisse arbitrantur, e. c. DAN. GOTTFR. SCHREBER (*Samml. öconomicisher Schriften, P. 12.* p. 481. *P. 14.* p. 354.). TILLET, READ, ut taceam alias explicationes. Hactenus vera originis ratio nondum euista. Numero maiori collecti hi clavi, praecipue recentes, spirant odorem virosum, imo

Y 5

ipse

ipse puluis. Sapor modice linguam pungit. Panis coloris saturate violacei est, odoris saporisque ingrati, nec tam auide absorbet aquam farina hocce vitio inquinata, quam alia, quae eo destituitur (TESSIER). Infusione horum clavorum cum aqua superficies eius tegitur cuticula pingui odoris foetidi (TESSIER p. 56.). Puluis aqua humectatus nihil glutinosi prodit in pasta, qua in re cl. TESSIER cum cl. MODEL (*Forts. der chym. Nebenfond.* p. 56.) in multiplici circa alia analyseos momenta dissensu conuenit. Tingens eorum pars partim aqua partim alcali fixo caustico extrahitur. Ut paucis discrimen inter clavorum fecalinorum et fecalis naturam pateat: sic habeto. Clavi isti nuper descripti (non alii infra dicendi) continent principium odorum valde foetidum, aërem fixum, aërem inflammabilem, magnam quantitatem olei dulcis, exiguum portionem materiae extractuae gummosae, quae mutationi valde obnoxia est, et facile in alcali volatile degenerat, exiguum terrae; Secale autem multum mucilaginis sub analysi exhibit, pauxillum modo olei, spiritum acidum, et ad finem destillationis aperto igne factae, exiguum alcali volatilis, sed longe plus alcali fixi ex cineribus eruendi (TESSIER p. 58.).

Vitio

Vitio huic Secalis multi medici miseriis istum plenum morbum, spasmodicum epidemicum, adscriperunt, quin sphacelosam labem artuum, imo nasi, epidemicam, quae posterior aliquando nullum cum priori morbo nexum habuit. Huius malignitatis claos fecalinos reos fecere SCRINCI, morbum spasmodicum in Bohemia grassantem describens (*Med. Siles. Satyr. spec. 4. Obs. 5. p. 54.*), SALERNE (*Mem. pres. à l'ac. R. d. sc. vol. 2. p. 155.*) de sphacelo illo vnicē agens, TISSOTUS (*Epist. medico-pract. p. 490.*), qui vtrumque morbum ad claos istos refert, aliique. Nolo ad vetustiores iudices regredi: sed memorandum quicquid dubii serius sententiarum diuortium excitare potuerit, ex eodem fonte morbum conuulsuum epidemicum nuper adhuc deriuasse cl. LINDVALL ET BERGIUM (*Veckoskrift för Läkare och Naturforskare, vol. 7. p. 61. 65.*). Ad dirimendam litem, quum difficilius experimenta in hominibus ex instituto capi possint: crederet aliquis, alia in brutis facta substitui horum in locum non male posse. Sed ambiguos nos reddit diuersitas insignis euentus notati, quum sint, qui ab utraque parte militent. Liberat ab hacce accusatione claos fecalinos cl. MODEL (*l. c. p. 54 sqq.*), quum illos cum alio frumento commixtos impune columbis

columbis prōiecerit, nec sub hoc connubio in panem subacti et cocti nocuerint. Cl. SCHLEGER (*Progr. clavos secalinos perperam a nonnullis venenum morbique rigidi causam nominari, Casselis 1772.*), experimentis in muscis, canibus, gallinis, in sue, oue et carpionibus factis, item ex applicatione ad vulnus recens in digito hominis facta, innocuos declarat, etsi non negat ex masticatione sensum punctionis percipi, et puluerem naribus attractum easdem instar Tabaci fortis vellicare, et monet, si quid noxae haberet, exiguum istam futuram, quum tam parua quantitate cum frumento mixta esset, plurimam enim partem vel in agro decidere vel in horreo. Cl. PARMENTIER (*Observations et additions aux Recreations chimiques de Mr. MODEL p. 425 sqq.*) experimenta in brutis quibusdam instituit, scilicet in columba, gallina, cane, quae omnia nihil mali passa sunt ex connubio clavorum secalinorum cum aliis alimentis, vel dum contriti cum farina in panem versi fuerant. Alii nullum aliud malum accessisse animalibus ex esu experti sunt, quam constipationem alui, et inde exortam inflationem ventris. Hancce molestiam obseruauit in duobus canibus cl. SCHLEGER (*I. c.*). Quod unicum incommodum quoque in Suecia notauit cl.

WÄHLIN

WÄHLIN (*Vet. Acad. Handl.* 1771. p. 39.) — Proprius ad dijudicandam vim clauorum omnino accedit exploratio eiusdem in ipso humano corpore. Memorabile igitur, quod cl. PARMENTIER (*l. c.* p. 427.) narrat, se ipsum per hebdomadem mane ieenum dimidiā drachmā eorum, item carnem columbae et gallinae supra dictarum impune ingessisse. Memini quoque me legisse (locus excedit), duos mendicos per octo dies pane clavis hisce impraeagnato ea quantitate vſos esse, ut quotidie vncia vna cum tribus drachmis clauorum caperentur, idque sine damno, non excluso tamen alio cibo. Ita cl. SCHREBER (*Samml. öcon. Schriften*, P. 14. p. 362.) sine noxa pluries vitiosa haecce grana per agros inambulando deglutivit.

Sed quam contrarii hactenus dictis iiuentus, qui aliis sub experimentis apud bruta obuiam venerunt. Cl^{mo}. SCRINCI (*l. c.* p. 55.) narrante, canis pane deuorato ex Secali corniculato cocto inter horrendos spasmos periit, quod idem accidit porcis, anseribus, gallinis ex eadem dape. Sus, quam cl. SALERNE (*l. c.* p. 156.) Hordeo cum parte tertia clauorum fecalinorum mixto faginandam curauerat, sub inflationis ventris et gangraenae variis

variis partium internarum vestigiis, mutato et si postea pabulo ob defectum clauorum, interiit. Ita ex peregrina communicatione pulli gallinacei duo necati et sus, praeuia iactura pedum et au-
rium, simili pabulo. Eadem de alia sue a cl. READ
(apud TESSIER *l. c. p. 91.*) memoriae prodita, qui
et decoctum saturatum melle mixtum illico muscis
necem attulisse exponit. Sine dubio longe mai-
orem accurationem adhibuit sub experimentis suis,
quae et reliqua numero superant et momentorum
varietate, subiuncta anatome, cl. TESSIER (*l. c. p.*
105 sqq. Cfr. et *Mem. de la Soc. de Medec. de Paris,*
tom. 2. p. 587. vbi recusa extant experimenta
eius, quae spectant ad damnum animalibus allat-
um aliaque, quae eorum taedium aduersus esum
Secalis corniculati demonstrant.). Cum alio fru-
mento commisti hi clavi anates duas, meleagri-
dem et duas sues iuniores, gangraena praeuia ex-
stinxerunt. Alia animalia panem inde cum farina
paratum omnino repudiarunt, nec fame quidem
ad illum deuorandum cogi potuerunt. Ut ne
vero existimaretur eam nocendi vim vnice recenti-
Secali corniculato competere, aliis experimentis
in anatibus et gallinis ab eo captis constituit.

Difficile

Difficile valde est conciliare duo tam diuersa de clavis fecalinis potestate effata, et errores ex alterutra parte in experimentis commissos detegere. Si qua conclusio ad similem apud homines labem inde deducenda sit, fateor symptomata maligna apud animalia percepta potius aliquam de origine epidemiae istius gangraenosae lucem accendere, quam de origine morbi conuulsui epidemicu, qui sua natura differre videtur. Sed quidni credamus ipsos illos clavos alio tempore esse funestos, alio innocuos, Nempe in ditione Cellensi iis in locis, vbi morbus viguit, clavi isti interne coeruleo grisei, tenaces cum odore nauseoso mucido et sapore caustico extiterunt; alibi vero praecedentibus annis collecti albi, farinosi, insipidi fuerunt (*TAUBE Geschichte d. Kriebel-Krankheit, p. 163.*). Et curne suspicemur, eandem deleteriam causam, quae ipsa grana Secalis cerealis vitiat, et farinam iis impertit coeruleo-griseam tenacem, odorem mucidum, saporemque acrem, eadem germinandi potentia priuat (*Vid. loc. cit.*), etiam Secali cornuto labem adspergere. Virus clauorum corruptorum additamento sani frumenti omnino infringitur, prout aqua nequitiam ipsius Mercurii sublimati, et Arsenici minuit: attamen protractiori usu lenti
veneni

veneni instar considerandum arbitror. Nec paganorum dispendum nullum hoc est, etiamsi liberes claos hosce a veneni acris, conuulsiones excitantis, infamia, quod in spicis locum granorum secalinorum occupent; nempe in Solonia (Sologne) Galliae aliquando quartam vel tertiam partem messis effecerunt (TESSIER *l. c. p. 179.*). Et, quum in horum miscela panis nec porosus euadat, nec ob defectum mucilaginis in Secali cornuto rite nutrit: intelligitur omnis generis claos secalinos cribro vel vanno esse sedulo separandos, ne valetudini vis inferatur. — Praeter claos secalinos, impallescidentiam spicarum (Svecis Hvitax) ex defectu nutrimenti, quod intercipiunt quaedam infecta in herba, et pumilam staturam culmorum ex eodem vitio, tanquam morbos Secalis, nomino.

Insignis enim infectorum varietas Secale sub varia eius aetate deuauitat, dum adhuc laruae forma vtuntur. Quaedam radicem ipsam consumunt, ut larua Scarabaei solstitialis, aliaque infecti adhuc ignoti (OSBECK in *Vet. Ac. Handl. 1776. p. 303 sq.*). — Aliae praecidunt culmum prope radicem, vel nidulantur in ipso culmo eumque erodunt, ut

Elater

Elater segetis (BJERKANDER in *Vet. Acad. Handl.* 1779. p. 284.), Musca fecalis et calamitosa aliaeque muscae (ID. l. c. 1777. p. 29 sq.), Phalaena turca, Tipula oleracea et Tipula fecalis (ID. l. c. 1779. p. 161.). Phalaena fecalis (ROLANDER l. c. 1752. p. 62. BJERKANDER l. c. 1778. p. 289.), item Ichneumon extensor (l. c. p. 293.). Musca pumilio-nis si oua deponit in culmos, hi pumilam modo staturam assequuntur, idque tanta interdum frequentia, ut culmi huius indolis octo ad quatuordecim spatio duorum pedum quadratorum reperiuntur (BJERKANDER l. c. 1778. p. 240.). Noctu larua Phalaenae conspicillaris autumno praemordet tenellum secale (BJERKANDER l. c. 1783. p. 152. sq.). — Grana vero Secalis, dum adhuc spicis insunt, in agris excauat Ichneumon culpatorius, quin sensim consumit (BJERKANDER l. c. 1778. p. 334.); et Thrips Physapus (DE GEER *Vet. Acad. Handl.* 1744. p. 6.) in causa est, ut Secalis spicae plane saepe abortiant. — Phalaena granella (DE GEER *Vet. Acad. Handl.* 1746. p. 49 sqq.) et Curculio granarius autem in promptuariis ipsis strages suas exercent (WILCKE l. c. p. 283.). — Nociuis istic animalculis addi debet Limax agrestis, qui saepe Secalis herbam emergentem consumit.

SEMEN ipsum Secalis est subcylindricum, vno extremo obtusum, altero, cui corculum oblique insidet, acutum, fulco vno longitudinali, cinerascens, semipellucidum.

Farina fecalina magis nigra est, quam ista Tritici et subdulcis. Facile aqua calida macerata fermentatione acefecit. Sic laminas ferreas, quae illi immerguntur, arrodit, vt stannum faciliter adfigat (*RINMAN Järnets Historia, vol. I. p. 40.*). Farina sicca calefacta inflammationes resoluit in superficie corporis obuias; in cataplasmate emollit et maturat. Puls, ex farina hacce aqua et butyro insulso cocta, vel sola vel lacte caprino comesta mane per plures hebdomades vel menses in phthiseos initio iuuat, in inueterata malum mitigat (*LANGE misc. verit. med. p. 34.*). Iusculum fecalimum pariter profuit pluries, scilicet paratum ex farinae fecalis subtilioris vncia dimidia cocta cum aquae libra vna, et omni mane bibitum; subinde conduxit, mane pulte ex Musco Islandico vti, et vesperi iuscule fecalino (*BANG Prax. med. p. 539.*).

Primarius autem usus Secalis pro pane est. Panis praecipue in regionibus septentrioni propriis placet, vt Germania, et adhuc frigidioribus. Glutinoso isto Tritici destituitur, probe tamen alit

alit gratique saporis est. In iis, qui ad acidum primarum viarum inclinant, panis secalinus molestam sodam et ructus acidos ciere solet, quod ipse comperi, magis autem triticeo conuenit iis, qui aluum tardam experiuntur. Non tam facile ex-arescit, vt panis ex alio frumento coctus. Supra iam dixi, varia proportione misceri hinc inde Secale cum Tritico pro pane, vnde albidior fit. Si furfures pastam reliquam intrant, rudior omni- no euadit, nomenque panis militaris obtinet. De panificio generalius supra sub Tritico (p. 330. sq.) praecipua exposui. Sed nec hic attinet indicasse nomina panis secalini singula, a forma, coquendi artificio, miscela, duritie varia &c. petita. Durior vt iste, quo rustici et famulitium in Suecia vtun- tur, forma disci et foramine medio instructus, quo per series perticis appendi possit, bonam partem rationem in se continet albedinis dentium, qua hocce hominum genüs fruitur, licet non diffitear acorem ipsum panis aliquid adhuc ad id conferre posse. Panis segmentum leuiter tostum si aquae immergitur, potulentum in acutis reficiens et salubre ob acorem subministrat, quod longe serius taedium parit, quam reliqua fere omnia potulenta; potest illi quoque succus Citri et faccha-

rum pro arbitrio addi. Durior, quin in molliori pane fecalino, crusta externa folet esse quam in alio. Calidus autem, dissectus et aqua Hungarica vel spiritu vini camphorato humectatus et abdomini impositus, sudore excitato aliquando febrem intermittentem fanat (*ROSENSTEIN om Barns Sjukd. p. 315.*). Spargit quoque panis calidus praecipue fecalinus halitus analepticos, naribus subiectus, exemplo notissimo DEMOCRITI, qui senex decrepitus et morti proximus vitam per aliquot dies ad celebrandas nuptias dilectae fororis sustentauit, olfaciendo continuo panem calidum vino humectatum. Idem tamen halitus panis, intra conclave arctum abundantius noctu praecipue retenti, instar fermentescentis musti vel vini in cella clausa necem afferunt. Mica panis nigri recentis, digitis tractata et applicata, dolores in clavis pedum tollit, et eosdem extirpat, experimento monachorum Franciscanorum et Capucinorum (*SINGEISEN Diff. de ophthalmia, Erlang. 1786. p. 25.*). Mica contrita in connubio salis vesci et seminum Carui contusorum cephalalgiam capiti per linteam applicata leuat. Furfures tosti, donec colorem Coffeae contritae adsciscant et linteo inuoluti sponte ignem concipiunt (*Zürch. med. Magaz. 1773. p. 238.*).

Secale

Secale quoque ad SPIRITUM FRUMENTI obtinen-
dum impenditur. Quin in Germania et septen-
trionalibus regionibus praecipuum eius fontem
constituit. Saepe tamen illi aliud frumentum, vt
Hordeum vel Triticum, vel vtrumque varia pro-
portione admiscetur. Et in hunc finem vel germina-
tione praegressa, vel ea omissa, rudius contusum
frumentum maceratur rite aqua calida, dein fece
cereuisiae adiecta fermentatio suscitatur, qua ad
finem tendente massa in vas a destillationi accom-
modata transfertur et destillatio post aliquam moram
incipitur, et continuatur quam diu liquor spiri-
tuosam naturam et saporem seruat. Quoniam
autem transiens liquidum nimis debile est et
ingratum, iterata destillatione fortius redditur. Al-
cohol adeo, puluerem pyrium accendens, inde pa-
rari potest (quomodo, declarat cl. LICHENSTEIN
in CRELLES *Annal.* 1786. P. 2. p. 306.). Non hu-
ius loci est omnes encheires exponere, ad spi-
ritum frumenti eliciendum idoneas (*Practica mo-*
menta bene persequutus est CHRIST in Regeln vom
Fruchtbrandwein-Brennen, 1785. 8.). Studio quo-
que praetereo artificia varia, quibus empyreuma-
tico odore, turbido habitu aliisque vitiis, priuetur.
A spiritu vini probae notae requiritur, vt pelluci-

dus omnino sit, nec odore nec sapore aduentitio displiceat, accensus paucum modo aquae relinquat, bullulas agitatus generet, oleum expressum, si infunditur, ad fundum vasis transmittat. Exploratur quoque virtus experimentis hydrostaticis (V. FAGGOT in *Vet. Acad. Handl.* 1766. p. 249. Compara instrumentum a cl. PAULIN propositum in *Hist. de la Soc. à Montpellier*, vol. 2. p. 485. sq.). Gratior et fortior est spiritus vini frumentaceo. Ingratus fapor spiritus frumenti dependet ab oleo, quod destillatione simul elicetur. Nam si hoc, hiemali frigore instar sedimenti albi fundum in spiritu isto petens, in cochleari liquatur, pinguedinem refert, et spiritu vini gallico solutum, istum eodem integrato sapore impertit (SCHEELE in CRELLS *Annal.* 1785. P. I. p. 61.). Crebro tamen pro extracti-
nibus, essentiis, tincturis &c. adhibetur. Quae de
vsi diaetetico inflammabilium spirituum sectione
de spiritu vini egi (*Appar. med.* vol. I. p. 320.),
transferri ad hunc quoque possunt. Quod rema-
net post destillationem saginandis et pinguefacien-
dis pecoribus conduit.

Nec silentio plane praeterire hic licet Secalis
tost, loco Coffeae, usum (Vid. *Appar. med.* vol. I.
p. 393.).

p. 393.). Non proximis modo hisce annis huic fini par visum est, sed iam a. 1714. DILLENIUS (*Ephem. nat. curios. cent. 3. 4. Obs. 150. p. 345.*) istum potum commendauit, et, ne oleosum Coffeae deficeret, addidit pro tostione amygdalarum portionem. Secale tostum vero eam spem iniecit, vt ne, sicut a Coffea vera, aestus, peruigilium, tremor subsequerentur, tum demum pecuniae pro merce exotica parcendum esse crediderunt. Sed praestaret omnino abstinere a potu, qui inter multa bona verae Coffeae, quae isti desunt, id mali semper secum vehit, quod calide potetur, et ob vile pretium ad potandum tanto auidius pauperiores inuitet.

PRAEPARATA ET COMPOSITA.

Ad huncce articulum refero AQUAM PANIS *Ph. W.* p. 21. cuius vis analeptica potius a vino et aromatibus additis repetenda; item et EMPLASTRUM DE CRUSTA PANIS *Ph. W.* p. 61. ad cuius stomachicam vim panis vix aliquid confert, sed gummi resinae et aromatica, quae intrant. Hinc nec panis genus, ex quo crusta desumpta in formulis memoratur. Vtrumque hodie exoleuit.

H O R D E V M.

LINN. *Syst. veg.* p. 107. *Gen. pl.* p. 39.

542.

Pharm. HORDEVM f. HORDEI Semen.

Hordeum vulgare; flosculis omnibus hermaphroditis aristatis, ordinibus duobus erectioribus LINN. *Spec. pl.* p. 125. *Hordeum polystichon* hypernum c. b. *Hordeum (polystichon)* flosculis omnibus fertilibus, ordinibus indistinctis HALLER in *Comm. soc. sc. Gotting.* 1775. p. 5. tab. 2. fig. 18. Wintergerste Germanis. Icon: REGNAULT *Botan.* L'Orge. Gramen annum ignotae patriae. Varietas eius exstat β , *Hordeum coeleste*, feminibus decorticatis, h. e. gluma florali exteriōri, quae in altera varietate firmiter adhaeret, denudatis; vnde nackte Gerste a Germanis vocatur; ipfa maturitate aristas perdit. — Haec species vulgo versus hiemem seritur, rarius vere; vnde nomen Germanicum dictum.

Hordeum distichon; flosculis lateralibus masculis muticis, feminibus angularibus imbricatis LINN. *Spec. pl.* p. 125. *Hordeum distichon* c. b. *Hordeum (aestuum) spicis explanatis*, flosculorum duobus ordini.

ordinibus fertilibus, inter mediis quaternis sterilibus HALL. in *Comm. soc. sc. Gotting.* 1775. p. 6. tab. 3. fig. 24. Gramen annum, de cuius patria LINNEUS in *Syst. veg.* ed. 13. p. 107. scripsit, habitare ad Samaram Tatariae fluum; circa quod argumentum ponderanda ea, quae alibi (supra p. 321.) dicta sunt. Et huius varietas exstat β , Hordeum *nudum*, seminibus decorticatis. — Haec species tempore verno seritur et exeunte aestate maturescit; vnde Sommergerste Germanis.

Hicce duabus speciebus Hordei vulgo acquiesci solet, et si hinc inde et Hordeum hexastichon L. quae ditissimae messis spem excitat, item Hordeum zeocriton L. quoque seritur. Praerogatiua tamen tribuitur Hordeo vulgari L. quod H. hexasticho similimum est. Granum minus tenerum praebet disticho.

Hordeum, Κριθή, antiquissimum omnium frumentorum habetur et Atticum solum tanquam patria conceditur, licet ars colendi illud aliunde accessisse videatur (HEYNE *Opusc.* vol. 1. pag. 353.). Spontaneum vna cum Auena in Sicilia crescere et copiosissime quidem circa Marzamemi sibi cum fiducia persuadet ill. RIEDESEL (*Reise durch Sicilien u.*

Großgriechenland, p. 79.). In regionibus orientalibus quoque colitur. Per totam Europam ad Lapponiam vsque familiare, septentrionalibus gentibus praecipue placet, quum intra breue tempus maturescat, Hordeum aestivum adeo intra 55 vel 58 dies, et minus reliquis cerealibus frigoris impatiens sit messemque ubiorem suppeditet. Saepe iunctim cum alio frumento, Avena adeo, ferit sub spe maioris lucri.

Vstilagine (Orge charbonné, Vid. TESSIER *Traité des maladies des grains, tab. ad pag. 305. fig. 2. 3. 4.*) saepe infestatur, quae gluma abdi solet, superstitibus aristis, vnde non tam facile vento et pluvia dispergitur. Causa videtur in ipsa radice quaerenda, nempe nunquam culmi ex eadem radice emergentes spicas fanas aliasque vstilagine vi- tias producunt, et vix nisi duae modo spicae emergunt. Profundior iusto fatio accusari solet.

Inter insecta, quae vim Hordeo inferunt, praecipue memoranda sunt *Tipula oleracea*, quae praecidit culnum prope terrae superficiem, et *Musca Frit LINN. in Vet. Acad. Handl. 1750. p. 184. Faun. Suec. p. 456.*), quae, licet modo pulicis magnitudine, granum decimum quoduis destruit, et

et eius atrophiam facit (Svecis Slökorn). Aliquando et accedit Chrysomela Polygoni instar infesti hospitis.

SEmen Hordei (cortice instructi) oblongum, medio crassius, vtrinque attenuatum, glabrum, coloris straminei, apice terminatum aristā linearī saepe diffracta, ventre longitudinaliter per medium fulcato, dorso et lateribus angulatis, medulla farnacea farctū.

Semen integrum, prout ex horreo colligitur, Hordeum crudum vocari solet; quod cortice autem per molendinam exutum est, mundatum (Gallis Orge grué); et quod mola in formam sphaericam redactum est, perlatum (Svec. Perlgryn, Germ. Perlengraupen) dicitur.

Hordeum antiquis tam cibi varia genera, quam potulenta varia suppeditabat accepta. Pollentam ($\Lambda\lambda\phi\pi\tau\sigma$) nominabant Hordeum aqua per noctem perfusum, siccatum frixum, dein commolitum. Ex hac aqua, lacte, vino, vel melle subacta panis speciem parabant, Maza ab iis nuncupatam. Cortice priuato Hordeo Ptisanae nomen indiderunt, quod tamen et tribuebant decocto ex hocce parato, vulgari in morbis acutis HIPPOCRATIS tempore

tempore potulento; vnde et ptisanae nomen ad alia decocta medicata transit. Cremor (Πτισσανής χυλος, Gerstenschleim Germ.) aqua ex Hordeo viscida dictus,

Nosmet, imitantes veteres in potu per febres acutas eligendo, hordeacea ptisana eaque tenuiori et tepida pariter creberrime vtimur. Pro pauperioribus sufficit coquere Hordei crudi e. c. vncias octo cum aqua pura, donec crepet, vt mensurae quatuor supersint; mensurae cuilibet mellis vncia vna vel duae adduntur, et aegris valde aestuantibus sub siccitate vel tarditate alui cremoris tartari vel nitri drachma vna vel duae; huius potus mensura vina ad tres supraque per diem ingeritur (DE HAEN *Rat. med.* P. 1. p. 6.). Ditionibus confert decoctum ex Hordeo perlato tam tenue, vt lactescensem modo colorem prae se ferat, cui quidem succo Citri et saccharo, vel Robis variis speciebus acidiusculis, vt Berberum, Rubi idaei, Cerazorum, gratia et refrigerans vis impertitur. Ita mucilagine abdita longior mora conceditur aquae in corpore nostro, colluuię primarum viarum emollitur et mobilis fit, acre, quod ibidem ad nau-seam vomitum vel diarrhoeam vellicat, inuoluitur et

et diluitur, ipse sanguis attenuatur et demulcetur, vasa flexiliora euadunt, secretiones et excretionos quaelibet melius succedunt, sitis leuatur, aestus temperatur.

Loco Auenae in Hispania aliisque calidis regionibus Hordeum equis proiicitur.

Hordeum aqua frigida in tabulatis, vel quod praefstat receptaculis commodis emollitum, dein per strata loco, quem aer bene perflat, distributum, speciem fermentationis subit et germina utrinque protrudit; quod ne ultra iustum limitem fiat, mox siccatur aere (Luftmalz Germ.), vel torretur (Darrmalz Germ.) super furnis commodis. AETIUS BURNUS appellauit; MALTUM (Malz Germ.) hoc recentiores vocant, *Hordeum tostum* non omnino recte dicitur. Scopus huius germinationis est, ut lento farinae vincatur, et oleosum cum acido in perfectam dulcedinem combinetur, quo aqua illam cum attenuata farinosa parte recipere queat. Proximum est, ut in rudiores partes mola frangatur (Malzschrot Germ.). Et haec quidem prima cereuisiae initia sunt, cui potissimum parandae haecce encheresis destinabatur. — Sed nostra aetate infusum est mustum Malti Hordei (Wort, vel Infusion of

Malt

Malt Anglis) medicina magni nominis euasit, quod ipsum extemporaneo labore, mox exponendo, paratur. Cl. DAVIDIS MACBRIDE (*Experimental Essays*, p. 172 sq.) meritum est, quod illud primus attentioni et experientiae medicorum commendauerit. Etenim perpendens curationem scorbuti marini plurimam partem a fermentescente vi plantarum recentium dependere, ingeniose coniecit, ad eundem scopum posse perueniri alio vegetabili licet non recenti huic tamen mutationi opportuno; et iam optio Malti facta est. Haec dum scriberet, neque ex propria experientia nec aliena virtutem confirmare potuit. Quam vere autem rem coniectauerit, fatis postea fida et pluries instituta eius in scorbuto dicto et putridis febribus administratione constitit. Confilium vero eius hoc fuit, ut Malti librae duae ciuiles ruditer comminutae triplo aquae feruentis perfundantur, et post follicitam motitationem per tres vel quatuor horas vase probe clauso digerantur, subsequa decantatione. Renouare autem conuenit hocce potulentum quotidie. Quam praedixerat antiscorbuticam efficaciam ille, huius paucos annos post capto in duplicita experimento tam eius frater quam chirurgi ex longis itineribus maritimis reduces fidem fecerunt,

runt, datis infusi Malti duabus vel tribus imo sex libris per diem; quibusdam tamen diarrhoeam creavit, vt sedare illam aliis commodis oporteret (*MACBRIDE's historical account of a new method of treating the Scurvy at Sea*, 1767. 8. item *Appendix ad auctoris Introduction to the theory and practice of Physic*, 1772. p. 639. *sqq.*). Sed iusto lentius in re noua maximi ponderis experimentis trutinanda processerunt ii, quibus in profectionibus maritimis longis maxima opportunitas suppetebat, chirurgi nimirum in regiis classibus merentes, etiam si collegium rei nauali regiae praefectum (Lords of the Admiralty) id fieri iuberet. *Quin HUXHAM aduersum iudicium initio obstatit, classiariorum in portu querelis inanibus aberrans. Defuit in breuiori itinere occasio iusta, et in longiori verum inuestigandi studium.* Tandem plures chirurgi Anglici in Indiam orientalem diuersis nauibus profecti optimo successu hocce infusum tentarunt, horumque obseruata publici iuris facta (a cl. BADENOCH in *Med. Observutions and Inquir.* vol. 5. p. 61. *sqq.*). Vix vero euidentius ullum documentum praeclarae eius in scorbuto praecaudo et curando efficacie desiderari potest, quam hoc, quod in itinere celeberrimi nauigatoris COOK circa orbem terrarum in comitatu centum

et

et nouendecimi hominum facto praestitit, quorum
vnum modo ante itineris initium vita decepsit, reli-
qui omnes huius infusi potissimum auxilio, quod
pro medicina fuit, seruati; vt tamen et reliquorum
praesidiorum sagacissimi viri sua stet dignitas (Cfr.
Appar. med. vol. 2. p. 332.). Adeo vero efficax in
arcendo morbo in hoc itinere fuit, vt rarer occa-
sio adesset tentandi, quid sanando iam praesente
valeret. Sed nec praesentibus manifestis sympto-
matibus scorbuti iners fuit (Vid. de hisce PRINGLE's
*Discourse upon some late improvements of the means for
preserving the health of mariners*, recus. in opere post-
humo: *Six Discourses, p. 163. sqq.*). Infusum vero in
hoc itinere paratum est ex Malti comminuti pinta
vna et aquae feruentis pintis duabus vel tribus,
cuius qui sibi de scorbuto metuebant quotidie
pintam vnam ad duas calide duabus vel tribus
horis ante et post pastum biberunt, magis infestati
quartas tres pluresue (FORSTER's *Observations made
in a voyage round the world, p. 633.*). Aliud simile
maxime memorabile exemplum virtutis exstitit in
expeditione nuperima ad Botany bay, in qua ex
ducentis et duodecim hominibus stipendia meren-
tibus vnum modo, ex septingentis septuaginta quin-
que autem, delicti causa ex Anglia illuc translati,
viginti

viginti quatuor modo, in itinere a Portu magno (Portsmouth) per triginta sex hebdomades, perierunt, reliquis contra scorbutum nonnisi infuso isto, etsi parcus subministrato, seruatis (TENCH's *Narrative of expedition to Botany bay*, p.46.). Si per linteum collatur liquidum, colorem pallidum dulcescentem et gratum obtinet, per viginti quatuor horas sub calore gr. 74 Fahrenh. seruat suam integritatem; sed intra horas triginta sex vappidum fit, acescit et spumam emittit in superficiem. Maltum coctum li- quorem praebet saturatiorem, grauiorem, visco- sum, nec tam cito fermentescentem (BADENOCH in MACBRIDE's *Append. l.c.* p.651.). Coqui etiam potest infusum hocce cum pane bis cocto, et saccharo edulcari, quod pariter cl. MACBRIDE commendauit. Scite coniungitur externa infusi et granorum calidorum post infusionem remanentium applicatio ad loca affecta (*Med. Obs. and Inquir. vol.5. p. 67. FORSTER l.c.*). Epithemata ex infuso Malti etiam depraedicat cl. LIND (in HUNCZOVSKY *Beob.* p.58.). Ratio virtutis facile cognoscitur ex simili effectu, quem alia frumenta praestant, fermentationem dum subeunt, vt placentae ex comminuto Malto Hordei et farina fecalina coctae et aqua calida perfusae, vnde fermentatione intra 24 horas potus, Russis

Appar. medic. Vol. V.

A a

vista-

visitatus, Quas emergit; ex vsu salutari pomacei, cereuisiae aliorumque liquorum vinoſo acidulorum, fructuum horaeorum et recentium vegetabilium cuiuscunque generis, quae omnia aëris fixi euolutione putridam diathesin, quae cauſa scorbuti est, corrigunt. Ne quis vero credat in auertendo scorbuto modo valere, memorandi sunt aegri, quorum gingiuæ spongiosæ, tumidae, dolorosæ, fanguinem fundentes, halitus oris foetidus, femora vel crura tumida, cutis maculis exanthematibus vel ulceribus foedata, respiratio difficultis, artus dolentes, habitus corporis leucophlegmaticus, diarrhoea continua, lotium foetidum (Conf. casus in MACBRIDE's Appendix in *Method. introduction et Med. Obs. and Inquir. l. c.* FORSTER's *Observ. cit.*). Effectus insuper mirifice celer est, vt sint qui intra triduum vel quadriduum doloribus scorbuticis et eruptionibus cutaneis liberantur. Solutio aluina sub vsu adiuuat efficaciam (Conf. MACBRIDE *l. c.* p. 650. 659. GAIRDNER in *Med. Obs. et Inquir. l. c.* p. 64.).

Non facile sub tanta testium varietate convelli haecce infusi Malti laus aduerso cl. CLARK (*Observations on the Diseases in long voyages to hot countries*, p. 182 sq.) effato potest, qui eo neque tollere

tollere malum, neque incrementum eius cohibere valuit. Perdere Maltum queritur post aliquot hebdomadum moram in mari saporem suum saccharinum, licet facile fermentescat, et addito saccharo aemuletur mustum Hordei recens. Sed aliorum obseruatione per duodecim menses (*Med. Obser. et Inquir. l. c. p. 65.*) Maltum suam integratatem seruauit, imo per duos annos (COOK apud PRINGLE *Discourse l. c. p. 173.*); tertio quidem licet manifeste labem contraxisset: infusum tamen virtute sua non cassum exstigit, modo plus solito Malti sumeretur (CHIR. PATTEN apud PRINGLE *l. c.*). Limitat quoque cel. AASKOW (in *Soc. med. Havn. collectan. vol. I. p. 60.*) praestantiam eius in scorbuto, sub initium morbi quidem iuuuisse narrans praeferunt accidente diarrhoea, et augmentum coercuisse, in consummato autem scorbuto aluinum profluuum auxisse, solo infuso nullum conualuisse; cereuisiae autem probae manifestius auxilium tribuit: ast dolendum non facile suppeteret illam in nauigiis per longius iter. — Mota et alibi querala est, quod in quibusdam nautis scorbuticis inde vehementes alui deiectiones subsequutae fuerint (DESBOUT in *Hist. de la Societé R. de Medecine, tom. 6. p. 273.*).

Aa 2

Dicta

Dicta haec tis ad vim antiscorbuticam infusi
Malti spectant, quam vero confirmans nouis ex-
emplis cl. COLLIN, eandem (*Observ. circa morbos,*
P. 4. p. 133.) simul ad febrem putridam biliosam
variasque biliosas affectiones, vomitione vel dia-
rrhoea stipatas, item exulcerationes extendit, et ex-
centenis casibus, quorum viginti nobiscum com-
municauit, colligit, ut propria eius verba ferunt,
infusum hocce esse egregium antemeticum, anti-
putredinosum, antiscorbuticum, digestionem cibo-
rum iuare et corrigere, sitem cito sedare et bonum
nutrimentum afferre. Iste vero Malti Hordei vn-
cias sex cum aquae mensura vna per quadrantem
horae coctas commiscerit cum seminum Foeniculi
scrupulis quatuor, Glycyrrhizae drachmis duabus
vel tribus, et post digestionem per quatuor horas,
liquidum colandum curauit; huiusque librae duea
vel tres quotidie per diem exhibitae sunt (*loc. cit.*
p. 173.). — In ulceribus obstinatis aliis, praeter-
quam scorbuticis, quoque in Anglia suppetias sub
interno usu tulit, quorum spectat casus foeminae,
quae infectione venerea eiusmodi contraxerat Mer-
curium eludentia, aliasque foeminae, post puer-
perium vlcere super osse ileo rebelli afflictae (RUSH
in *Med. Observ. and Inquir. vol. 4. p. 367.*). — Et
claris

clari nominis vir (PERCIVAL in suis *Essays med. and experim.* vol. 2. p. 79.) in scrophulosis affectionibus aliisque maliis, in quibus acrimonia vniuersalis obtinet et morbosa sanguinis tenuitas, ab eo praestans auxilium exspectat, ipseque vibices intra paucos dies eo disparuisse expertus est.

Idem Hordeum post germinationem leuorem tostum vel siccatum demum pinsitum, s. Maltum ruditer comminatum, *Cereuisiae* materies est maxime vulgaris. Inter multa alia nomina huic potulento antiquitus tributa, quorsum Ζυθος, Βευτον, Κουρη, Πινος, eminet ob scitam rei diiudicationem Οινος πριθινος (vinum hordeaceum) ATHENAEI (*Deiphilosop.* lib. 10. cap. 13 ad fin.). Potus ex hoc aliisue frumentis pro siti fallenda paratus nec Graecos nec Aegyptios olim latuit, antiquis quoque Germanis notus satis fuit (docente TACITO *de morib. German.* ed. GRONOV. p. 407.), etsi omnino confitendum, variare hodie artem cereuisiam coquendi, granorum praeparatione, fermentatione, addimento vario. Maltum hodie in hunc finem sub variis vasorum mutationibus et infusionibus aquae coquitur, et coctio tam diu continuatur, donec decoctum saturate dulce et clarum obtineatur (Mu-

stum Hordei, Wört Svec., Würze Germ.). Additur tum Lupulus, vel, quod praefstat, aqua antea decoctus, vel cum musto decoquendus, idque fit tam ad mitigandam dulcedinem quam ad auerendum acorem. Quibus factis fermentationi liquidi committitur, acceleranda fermento adiecto siue fece cereuisiae, et ante fermentationem omnino cessantem in dolia transfertur, quo ibidem absolui omnino possit. Inter innumera scripta, quae de arte cereuisiaria prodierunt, notanda HAGENS *Abhandl. chem. u. phys. Inhalts*, n. 3. 1778. Königsb. SIMONS *Kunst d. Bierbrauens nach richtigen Grundsätzen d. Chymie u. Oeconomie*, Dresd. 1781. RICHARDSON's *Hints on an improved practice of brewing malt liquors* 1781. Ad hydrostatica autem experimenta, quae virtutem cereuisiae determinant, spectant RICHARDSON's *statical estimate of the materials of brewing* 1784 et BAVERSTOCK's *hydrometrical Observations and Experiments in the brewery*, Lond. 1786. Sunt et cereuisiae vel pauxillo modo Lupuli impraegnatae, vel illo omnino destitutae: *albae* hae posteriores vocantur, licet tamen et albedo a Malto, aëre tantum siccato vel leniter tosto, vel Tritico ad partem vel omnino adhibito deriuanda, prout et *brunae* colorem vel tostioni maiori vel Lupulo colorem debent.

Ita

Ita euoluuntur partim coctione, partim fermentatione duplici, spiritus et mucilaginosae partes, quae Hordeo insunt, et quum haec multis aquofis diluta in cereuisia exstant, facile per corporis humani vasa distribuuntur. Difficile quatuor ista bonae cereuisiae requisita, Maltum, Lupulus, fermentum et aqua, in summa sua integritate combinantur, nec ars coquendi illam et tractandi, postquam domum translata fuerit, vbiuis aequali notitia exercetur. Non mirum igitur cereuisiam pluribus vitiis multis in locis laborare. Secundaria cereuisia (Cofent) tenuis ista est, quae obtinetur noua portione aquae Malto iam excocito superinfusa, et cum residuo Lupuli cocta. Quicquid vel hocce liquido effuso remanet, faginandis pecoribus ob nutritias particulas superstites inferuit. Praeter Triticum et Hordeum, quibusdam in locis ex Avena item ex Secale, cereuisia coquitur, in Indiis ex Oryza, in America ex Zea Mays. Impraegnatur et subinde ista variis aromaticis sub ipsa fermentatione vel coctione admistis vel in facculo suspensis. Quae in America septentrionali ex ramulis foliiferis concisis Pini Canadensis LINN. (White Spruce Fir) et alias speciei Pini, quae Abies Mariana, foliis linearibus acutis, conis minimis MILL.

Aa 4

(Black)

(Black Spruce Fir) paratur cereuisia, vix hocce nomen meretur, quum modo ex decocto ramulorum cum aqua fermentatione ope fecis fuscitata paretur, addito ad bituminosum saporem vincendum saccharo, licet et subinde tantillum frumenti in nigredinem tosti, vel et placentulae ex frumento, vt et nutriendi vim habeat, addantur. Eiusdem naturae est cereuisia e baccis Juniperi in Svecia parata (Vid. *Appar. med. vol. 1. p. 36.*). De cereuisia Gill-ale Anglorum alibi dixi (*Appar. med. vol. 2. p. 175.*). Vituperanda quaelibet additamenta, quae inebriant et caput obnubilant, vt amara olim varia, sub defectu Lupuli visitata, aliqua, Absynthium, Gale, Millefolium. Cereuisia hordeacea iis praecipue locis, in quibus vinum deficit, in deliciis est. Bonae notae cereuisia esse debet non acida, sed amarescens, spumam modice agens dum effunditur, sine qua aërem fixum a fugisse iudicatur. Nocet vero ista, cuius fermentatio suppressa, quae non solum ampullas dispropedit, sed colicam flatulentam, stranguriam, inflammations ventriculi et intestinorum creat; nocet et male cocta, vel nimis recens, vel fece inquinata, flatus torminaque excitando. Displicet, quae vel ex defectu necessarii fermentationis gradus vel accessu

accessu aëris ad vasa, quibus seruatur, Gas suo destituitur, et inde vappidum saporem contrahit. Salubrem ceteroquin cereuisia potum constituit, vt qui sanguinem diluit, probe nutrit, praecipue fortior (Doppeltbier), amaritie ventriculum roborat, neruos refocillat, sitim sedat, aëre fixo, quem continet, nisum ad putredinem humorum infringit (V. supra p. 337.), lotio præsertim fabulum eliminat. Cereuisia probae notae ob fixum aërem, quem continet, calculi vrinarii præseruatuum habetur, imo leuare eos, qui vere calculi molestias sentiunt, creditur. Inter 1400 homines, in quibus CYPRIANUS, vir olim clarus, lithotomiam exercuit, plures vino delectati fuerant, verum ne vnuus quidem cereuisiae deditus (ALLEN *Synops. med. præst.* Ed. Francof. p. 270.). Limitat tamen cl. DOBSON (*Med. Comment. on fixed air*, p. 136.) hanc a cereuisia sperandam immunitatem a calculo. Prout ipsa cereuisia scorbuti haud mediocre remedium est: ita et in hunc morbum tanto magis valet, si stirpes aliquot antiscorbuticae eodem dolio excipiuntur (V. *Appar. med. vol. 2.* p. 245.).

Cereuisia bruna ex libra vna in vincias duas coctione concentrata, ita vt syrum referat, cor-

- Aa 5

pora

pora resinoso gummosa efficaciter trituratione solvit (BUCHHOLZ in *Nov. act. nat. curios. tom. 5. p. 46.*), vt Gummi ammoniacum (*Exper. 7.*), Bdellium (*Exp. 13.*), Myrrham quoad partem (*Exp. 34.*), Opopanaxem (*Exp. 38.*).

Extrinsecus pudendis muliebribus, post partum difficultorem inflammatis et tumidis, commode cereuisia cum Salvia cocta et butyro non salito mixta applicatur; nec minus cereuisia, in qua butyrum liquatum, egregie dissipat tumores mammarum ex lacte coagulato (PLENCK *Mat. Chir. p. 541.*).

Iuscula culinari arte varia parantur ex cereuisia, quae exponere huius loci non est. Sed serum lactis ex lacte, cui sub coctionem cereuisia additur (Öhloftvassla Svecis), memorari hic debet, quum vulgarem gratum et salubrem in febribus acutis potum in Svecia suppeditet, qui taedium non tam facile parit ac alia potulenta. Dilui postea potest aqua calida addita, vt sitim tanto melius fallat. Sanis in Suecia caseofae lactis partes, Cinnamomo conspersae, vna cum sero isto saturationi gratum ferulum existunt.

Ex insigni isto numero cereuisiarum hordeacearum ob medicatam vim speciatim *Mumma Brunsvicensis*

suicensis dicenda est. Haec clara est, spissitudinem syrupi habet, coloris saturatius bruni et saporis grate dulcis. Transfertur in Indiam orientalem vsque illaes, quin ventione per mare praestantior fit. Medicamenti vero potius loco est, quam potui vulgari idonea; imbecilli enim ventriculo subuenit, neruos refocillat, et eximie nutrit. Rachiticis vniciam vnam Mummae cum pane bis cocto ter de die propinare confert (SWIETEN Comment. vol. 5. p. 618.). — Ad foetorem ulcerum cancerorum tollendum valet praecipue Mumma in spissitudinem vnguenti densata, nimirum linteo illita et applicata; suppuratione inde promouetur vixque cuti adhaeret, nec dolorem relinquit (Bemerk. üb. Gegenstände der Wundarzn. P. 2. p. 97.).

Acetum cereuisiae obtinetur si, omissa Lupulo, liquidum cereuisiae destinatum limitem spirituosa fermentationis transgreditur, et in alteram siue acidam transit. Promouetur haec calore conclavis et addito fermento, cuius magna varietas artificibus placet. Rarius ex cereuisia iam parata acetum produci solet (Conf. WALLERII Chem. phys. vol. 1. p. 273 sqq.). Generaliora momenta circa acetorum originem alibi dicta sunt, quum sermo de aceto vini inci-

incideret (*Appar. med. vol. 1. p. 321.*). Pellucidum esse decet, et acore insigni, quem et olfactus percipit, distingui. Debilius longe est aceto vini, attamen non spernendum vsu culinari et medico, quo ipso pauperioribus in febribus ad sitim extinguendam, febrem moderandam, putredinem refraneandam, subuenimus (*Conf. Appar. med. l.c.*).

Fex cereuifiae in pilulas redacta aluum mouet
(ROSENSTEIN om Barns fjkd. p. 68.).

Hordeum amyllum exhibet albido cinerascens, quod aqua coctum in gelatinam transit eiusdem coloris, tenacem. Ex vnciis tribus Hordei eruitur Amyli vncia una cum drachmis sex (*SCHEELE in BERG. Mat. med. p. 57.*). Nihil vero glutinosi acalescentis inest. — Cataplasma aqua coctum inde paratur, ad suppurationem mouendam commodum.

Panis hordeaceus subniger et grati saporis est, breui vero siccescit. Poenae loco Romani militibus delinquentibus in officio illum praebebant. Attamen rustici in Suecia eodem crebro vescuntur, prout olim alpicolis in Heluetia familiaris fuit (*HALL. l.c. p. 9.*).

Ex

Ex *Aristis* in fasciculum colligatis xystra sua fecit de WOOLHOUSEN, quibus in ophthalmia interiore palpebrarum tunicam radebat, sanguinis ex fauciatis vasis effluvium tepida aqua et vaporibus aquae calidae alens (PLATNERI Chirurg. § 298, qui quidem ex glumis Secalis xystra ista facta indicat). Sed haecce ophthalmoxyxis id vitii habet, quod spinae laterales aristae diuulse facile palpebris infigantur.

Hordeum viride pluries desecari se patitur, ut pabulum pecori gratum suppetat.

P R A E P A R A T A.

SACCHARUM HORDEATVM *Ph. Brunsv.* p. 312.
Ex saccharo albo soluto in decocto Hordei et in iustum densitatem inspissato, addito Croci tantillo; massa tandem, dum adhuc calet, discissa in bacilos contorquetur vel in tabulas formatur. In *Ph. Dan.* p. 224. et *SPIELM. Pharm. gener.* p. 285. omititur *Crocus*. Additur pulueribus salinis ad saporem corrigendum; item pro mitiganda tussi adhibetur.

SYRUPUS HORDEATUS *Cod. med. Paris.* p. 35.
Ex Amygdalis vtriusque generis contusis cum decocto

382 GRAMINA. HORDEVM VVLGARE REL.

cocito Hordei, addito saccharo et post inspissationem aqua Naphae. Vi non multum differt a SYRUPO AMYGDALINO *Ph. Dan.* p. 251. vel, ut vulgo vocatur, EMULSIVO, sed menstruum diuersum. Gramatum additamentum mixturarum, ex quibus acidum exulat. Vis ceteroquin a natura Amygdalarum diiudicanda.

AQUA HORDEATA *Pharm. Lond.* 1761. p. 60.
DECOCTVM HORDEI *Ph. Lond. Specim. 2.* p. 64. Ex Hordeo perlato cum aqua cocito, post abiectionem primam aquam additur noua et iteratur coctio. Ptisana in morbis acutis eximia.

AVENA

A V E N A.

LINN. *Syst. veg.* p. 104. *Gen. pl.* p. 37.

543.

Pharm. AVENA f. AVENAE Semen.

Auena sativa; paniculata, calycibus dispermis, seminibus laevisibus, altero aristato LINN. *Syst. veg.* l.c. α . *Auena nigra*; β . *Auena alba* c. b. *Auena panicula* vndiquaque sparsa, calycibus flore majoribus, gluma maiori cartilaginea HALLER in *Comm. soc. scient.* tom. 6. p. 16. Βρῶμος Graecis. *Icon:* MILL. *Illustr. Syst. sex.* REGNAULT *Botan.* L'Avoine. Gramen annuum. In insula Juan Fernandez sponte procrescere ANSON innuit, item in Sicilia idque in Marzamemi ill. DE RIEDESEL (*Reise durch Sicilien*, p. 79.); an a feminibus casu delapsis?

Varietatibus et haecce ludit pluribus, spiculis vñifloris, bifloris, trifloris, floribus mox omnino mox ad partem modo aristatis, mox muticis &c. Color quoque seminum pallide luteus vel niger vel albus vel fusco-fuluus est (Vid. HALL. l.c.). Tanquam peculiarem speciem merito proponit HALLERUS Auenam panicula *heteromalla*, calyce flore maior,

maiori, loculis bifloris, gluma maiori cartilaginea (*I. c. p. 181. tab. 4.*), quae est *Auena orientalis* SCHREB. *Spicileg. flor. Lips.* p. 52, cuius duplum varietatem hortus botanicus alit, proceriorem et humiliorem, proportione reliquarum partium eadem. Quae species quibusdam lucrosior censetur et sola Rupe, dum HALLERUS ibidem degebat, sata, item in Germania (SCHREE.). Etiam *Auena nuda* LINN. cuius semina decorticata decidunt hinc inde seritur e. c. in Suecia in montosis. Praefertur ex *Auena sativa* Var. alba vel pallide lutea nigrae. Omnibus vero praestantissimum est *Auena alba* Anglicana dicta, quum granum maximum et farina repletissimum item ponderosissimum contineat. Haec et autumno seri potest et hiemem fert, vnde et Winterhaber Germanis dicitur, licet non diffundendum, Auenam sativam sem. nigro, fero autumno et paullo profundius satam, hiemem quoque tolerare; culmis praeterea instruitur maioribus et crassioribus et numerosioribus. Ut igitur ruricolis lucrosissimum sit. Seritur *Auena* copiose per totam Europam ob insigne commodum et economicum et medicum, locisque montosis et mala silentioribus bene viget.

Vstila-

Vstilagine Charbon. Vid. *Fig. in TESSIER Traité des maladies des grains*, ad p. 336.) Auenæ præ omnibus frumentis maxime infestatur. Non in sola panicula latere causam, sed profundius, ex lento culmorum incremento et gracilitate et paucō eorum numero, item culmorum maculis nigro brunis, perspicitur. Puluis iste nigricans non aufugit ante messem, sed adhaerens paniculis ad partem in horreum transfertur. Animalium valetudini vim tamen inferre non videtur, ast non parum aduersus est lucro vberiori Auenæ, et ipsum stramenific vitiatae Auenæ pecori displicet (TESSIER, BJERKANDER in *Vet. Acad. Handl.* 1775. p. 319.).

Quas Tritici et Secalis grana in agris exedere larvas Ichneumonis culpatorii dixi, hae Auenæ grana etiam consumunt misere (BJERKANDER in *Vet. Acad. Handl.* 1778. p. 334.). Musca Auenæ autem culmos eius praecidit, vnde paniculae marcescunt, et albedinem contrahunt (BJERKANDER l. c. 1781. p. 171.). Taceo reliqua infecta Auenæ insidiantia.

Ingrata Auenæ satiuae hospes Auenæ satiua L. (Vid. SCHREB. v. d. Gräfern, tab. 15.) est, agrum eneruans, maiorem adhuc noxam allatura connu-

bio granorum, nisi ista citius grana maturans, quam A. sativa, eadem plerumque in ipsum agrum dimitteret.

SEmen oblongum, vtrinque extenuatum, altero extremo latiori, sulco uno medio longitudinali distinctum, cortice subangulato, nucleo villoso.

Amylum, quod Auenae inest, dimidiam eius partem constituit (SCHEELE in BERG. *Mat. med.* p. 58.), cinerascentis coloris. Aqua coctum in gelatinam comutatur cinereum bene compingentem. Gluten nullum in ea detegitur (KESSELMEIER *Dissert. quorundam vegetabilium principium nutriendis*, p. 23.).

Auenae usus iam antiquiori tempore cognitus. Nam PLINIUS (*Hist. natur. lib. 18. cap. 17.*) notat Germaniae populos eam ferere, neque alia pulueri vivere. Praemittit, vitium frumenti esse et Hordeum in eam degenerare. Non deest igitur errori nostro tempore de frumentorum transmutatione intonanti auctoritas, modo error adeo exueretur sua labe, quod multi et maiores adeo nostri eum colant:

Multis in locis equorum vnicet causa colitur. Stramen vero concisum Auenae addere conuenit,
quo

quo eam dentibus comminuant, quum alias indigesta plurimam partem alio exoneretur. Eundem finem assequimur Auena ruditer commolita, vel eiusdem farina cum fecalina mixta et in panem cocta, quod parsimoniae quoque valde gratificatur. Anserum et suum quoque saginam Auena constituit.

Sed hominibus ipsis quoque in multa emolumenta cedit. Grana integra, cum aqua ad crepaturam vsque cocta, potum in acutis idoneum, prout de Hordeo supra dictum est, sugerunt. Et haec quidem etiam intrant celebratissimum olim potum auenaceum LOWERI, de quo paullo post vberius.

Quibusdam in locis cereuisia ex Auena coquitur, quo fine confert praeprimis Auena alba Anglicana vti. Amara est haecce cereuisia sponte, vt parci possit Lupuli quantitati (WILLEMOT in *Vet. Acad. Handl.* 1751. p. 233.).

Auena excorticata s. *Grutum*, pro cibo sanorum vulgaris est ad iuscula spissiora, aqua vel lacte, additis passulis paneque cum butyro affato, parata, item ad pultes lacte vel vino comedendas. Bene et salubriter nutrit. Hinc et febrentibus pro cibo

B b 2

conce-

conceditur. Cocta cum copiosiori aqua potus consueti loco in febribus esse potest, coniungens ea beneficia, quae supra de ptifana (*Appar. med. vol. 5. p. 364.*) expōsui. Ob multum mucilaginis clysmatis instar domēstici est sub vulgari olei vnguinosi et salis communis connubio. Puls aqua facta et tepide applicata ad emolliendos et maturandos tumores egregie valet, e. c. in tumoribus mammarum a lacte coagulato, quae ipsa efficacius et tuitius secretionem lactis apud puerperas promouet, quam solitae istiae antliae.

Farina vasi ligneo indita et aqua calida perfusa, donec aceſcat, h. e. fermentationem subeat, potum suppeditat in ſcorbuto coērcendo proficuum. Nempe aqua decantatur et ad ſpiffitatem gelatinæ densatur, quae ſaccharo et vino gratior fit (*Conf. PRINGLE's Discourses, p. 170.*). Ratio efficaciae ex diſcis ſupra de Malto Hordei explicari potest. — Farina toſta in eryſipelatofis aliisque mitioribus tumoribus aliquando diſcutiendi fine applicatur.

Panis auenaceus nigricantem colorem habet et amaricantem faporem. A pauperioribus ruricolis in iis prouinciis Sueciae, in quibus non bene ſuccedunt alia frumenta, editur, item in Noruegia.

Ita

Ita quoque fit in montanis Freyburgi et Annaebergi
a fodinarum operariis (SCHREBER *Sammlung*, P. 5.
p. 138.).

PRAEPARATA ET COMPOSITA.

SPECIES PRO DECOCTO AVENAE f. BROMIO Ph.
W. p. 182. continet Auenam, Lignum Santalum
rubrum et radicem Cichorei, quibus rite cum aqua
coctis post colationem Nitrum antimoniatum et
Saccharum additur. Inuentum RICHARDI LOWER,
qui singulari libro *Bromographia Amstel.* 1669. illud
commendauit. Serius inclaruit FRANCI, qui librum
Germanice vertit, praeconio; praeципue autem
FRIDERICI HOFFMANNI (*Diff. de cura auenacea*; item
Med. rat. system. tom. 4. P. 1. sect. 2. cap. 13. p. 568.
variaque alia loca, item passim in EJUSD. *Medic.
consultatoria*) applausu. In febribus lentis et hec-
cis praeципue placuit. Quum praeterea arthriti-
dem, nephritidem, malum hypochondriacum, scor-
butum multasque alias labes sanare perhiberetur,
expertus est hic potus fatum, quod tot alia, ultra
modum laudata, ut contemtui et obliuioni trade-
retur. Libra vero eius dimidia ad integrām quo-
tidie per aliquot hebdomades bis ingerenda erat.

S A C C H A R V M.

LINN. *Syst. veg.* p. 88. *Gen. pl.* p. 32.

544.

Pharm. SACCHARVM; TAFFIA.

Saccharum officinarum; floribus paniculatis, foliis planis LINN. *Syst. veg.* l. c. Conf. SLOANE'S *Nat. Hist. of Jam.* tom. 1. p. 108. tab. 66., quae vero paniculam modo sifit; RUMPH. *Herb. Amb.* tom. 5. p. 186. tab. 74. fig. 1. HUGHES'S *Nat. Hist. of Barbados*, p. 244. tab. 23. fig. 1. *Saccharum geniculatum* et *succulentum* panicula spatiofa BROWNE'S *nat. Hist. of Jam.* p. 129. Depingitur quoque in REGNAULT *Botan. Le Sucre* et a cl. CAZAUD in *Philos. Transf.* vol. 69. P. 1. tab. 3. vbi praeter integrum stirpem furculi variae aetatis repraesentantur. Gramen perenne, sponte in Africa et Asiae inferiori parte, vt India orientali et Arabia felici, crescens. Quod ad Americam attinet, sunt, qui ante Europaeorum aduentum negant ibi fuisse spontaneum. Ast hodie maioris lucri causa plantationes sedulo ibidem praecipue sunt inter circulos tropicos, vt in noua Hispania, Brasilia, Guadelupa, Martinica, Domingo et

et omnibus fere terris situs commodi, quae in possessione Europaeorum sunt. Pro cultu solum plerumque aquosum et fertile et calida fatis statio eligitur, sed subinde in siccis quoque, imo arena, laete crescit (AUBLET). Europaeorum clima non fert: in Gallia frustranea experimenta pro eo sub dio alendo facta sunt, feliora in Hispania et Lusitania, sed non in usum oeconomicum continuata.

Non probabile est, Saccharum nostrum in Graecorum et Latinorum cognitionem venisse. Nomen Σακχαρον, σακχαρ, σακχαρι (DIOSC. lib. 2. cap. 104. GALEN. de simpl. med. facult. lib. 7. cap. 9. ed. CHART. vol. 13. p. 207.), vel Saccaron (PLIN. Hist. nat. lib. 12. cap. 8. p. 565. ed. DALECH.), vntuntur, sed eo intelligebant concrementum quoddam, ob dulcedinem cum melle ab ipsis comparatum, sibi quoad aspectum simile, item fragile, in arundine quadam vel circa eius culmos sponte collectum, non eiusmodi, quod nos arte varia elicimus, nec nisi ad scopum medicum suum Saccharum adhibebant. Melle autem cibis suis dulcedinem impertierunt, imo et medicamentis, quibus nosmet saccharum destinamus. Recentiorum nemo

est fide dignior, qui Saccharum in Arundine saccharifera notissima dicto modo concreuisse animaduenterit, quod tamen sub climate calidiori vel aetate maiori fieri forsitan potest. De Arundine Bambo L. autem constat, succum stolonum iuniorum dulcem esse, adultiorem vero stirpem liquorem exsudare, qui iuxta internodia vi solis concrescit et instar pumicis albi indurescit, quod dum fit, nativa sua suavitate exui fertur; quo levius albidius et glabrius hoc concrementum est, eo praestantius censetur, quo magis inaequale atque cinereum, eo vilius; Saccar Mambu indigenae vocant, apud scriptores Arabes Tabaxir, quae vox Persicae originis, s. Tabarzad nomine venit (Cfr. PISON, *Mant. aromat.* p. 186. et GARCIAE AB HORTO *aromat. Hist.* in CLUS, *Exot.* p. 164.). Memorabile, GALENUM suum Saccharum mellis quidem speciem vocare, sed minus certe dulce vulgari vel, ut eius voce vtav, "nostrate." Eo refelli poterit dubitatio, ne ex Arundine Bambo prouenerit, quod concrementum hocce dulcedine esset inferius. Attamen lubens dabo pluribus adhuc argumentis opus esse ad euincendam hanc Sacchari veterum originem.

Iisdem tenebris obnubilamur, in Arundinis sacchariferae verae prima initia inquisituri. Sunt,
qui

qui primum in insulis Canariis procreuisse existimant, sed diu Europaeis ignotum fuisse, donec Hispani et Lusitani circa littora Africæ commercia alere inciperent, et ad hasce in primis insulas appellerent. Vnde stirpem primum in Hispaniam et Lusitaniam reportarunt et ibidem non minus quam peregrinis suis regionibus coluerunt. Parcus tamen ex hisce aliisque locis, ut insula Madera, Scti Thomae, prouentus in usum Europaeorum fuit, donec America detegeretur, ubi studiosissime inde ab isto tempore locis supra iam a me significatis stirps culta fuit. Parem quoque solertia in littoribus Indiae et Africæ adhibuisse creduntur (BROWNE *l. c.* p. 130.). Alii ex Asia ad Cyprum indeque ad Siciliam tum denique ad insulas Canarias et Maderam transmigrasse arbitrantur.

Ex radice nodosa culmus enascitur indiuisus, sed foliatus, octo, decem, duodecim pedum, rarius octodecim supraque; ad binos pollices crassus, articulatus, articulis ad summum 46, diuersae longitudinis (CAZAUD in *Philos. Transf. l. c.* p. 252.), terminans se in apicem longum enodem, attenuatum, panicula coronatum.

B b 5

Propa-

Propagatio stirpis fit ope culmorum foliis denudatorum, qui ipsi in partes quindecim vel octodecim pollices longas, dissecti terrae molli leui, postquam fulci sex vel septem pollices profundi in ea facti fuerint, distantia aliquot pedum immittuntur. Singulis vero fulcis duo culmorum segmenta prout descripsi, oblique infiguntur, ut pars ad extrema fulci promineat. Ex gemmis articulorum tum erumpunt stolones, qui quatuordecim, fedecim vel octodecimi, mensium spatium pro maturatione, quae ipsa cognoscitur colore luteo, requirunt. Non ultra hocce tempus differri messis debet, ne culmus siccescat et indurescat, et succum deterioris notae, qui concretionem respuit, exhibeat. In colendi stirpem modo explicando euagari latius hic non vacat: curatius eundem persequuti sunt PISO (*Ind. utriusque res natur. et med. p. 108 sqq.*), LABAT (*Nouv. Voyage aux Isles de l'Amérique, tom. I. p. 224 sqq.*), BROWNE (*l. c.*), HUGHES, CAZAUD (*lcc. ctt.*).

Magnas strages in plantationibus excitat Formica sacchariuora (LINN. *Syst. veg. p. 963.*), nidos suos in culmis ipsis parans. Consumit succum et marcorem in culmis efficit. Migrationibus longis ex

vna

vna terra in aliam fese transferunt hae formicæ; in Martinica autem triste nequitiae humanae exemplum exstitit, quum in vindictam aliquis mercaturaæ prohibitæ conuictus in plantationem iudicis sui, Galli, transferret formicas hasce intra ampullam collectas, hic vero hospites hosce nocuos detegens fundum astute mercatoribus duobus Londinensis bus venderet (MAC INTOSH's *Travels in Europa Asia and Africa*, vol. I. p. 286.). Aliud insecti genus quoque memoratur, nondum satis determinatum, morbum excitans, quem Angli Yellow Blast vocant, destruens folia tenella, unde stirps marcescit peritque. Generantur et in morbosae stirpis foliis tubercula vermiculis albis repleta et maculae subbruni coloris (HUGHES l. c. p. 245.). Ipsae vulgatissimæ formicæ appetitu mirabili in saccharum quo vtimur, feruntur (De quo leg. narratio cl. GEN-TIL in *Voyage dans les mers de l'Inde*, tom. I. p. 679. sq. ingeniose ornata in *Götting. Taschenkal.* 1786. p. 180.).

Culmis Arundinis sacchariferae iustum matritatem assequutis, hi ipsi prope soli superficiem praeciduntur, trunci cum radicis adnatae parte auferuntur, vt ex reliquiis radicis noua post annum circiter culmorum messis fieri queat. Perennat vero stirps per viginti pluresque annos.

Folia

Folia tum vna cum panicula separantur et culmi in fasciculos vinciuntur. Hi ipsi mox in molen-dinum transferuntur, vt circumactis per equos, boues, ventum vel vi illabentis aquae, cylindris ferreis, per quorum interstitia transfiguntur, con-quassentur, et succum effundant (Le vessou Gall.), qui cisterna colligitur, vel, quod frequentius, mox per canalem in ahenum deriuatur. Coquitur hic addita calce viua vel eius aqua vel lixiuio sapo-niorum vel cineribus puris et despumatur. Horum aliquo opus est, vt superfluum acidum eo combinetur et saccharum in solidam compagem redigi possit. Transfertur postea succus in alia ahena, vnum post alterum, numero quatuor, sensim minora pro varia spissitudine et claritate, sub-iuncta in quolibet noua despumatione et additamento nouo dictorum, donec inter digitos receptus illos quasi conglutinet, tumque refrigerescat in vasis magnis (Canots) ligneis non admodum pro-fundis. Vna huius pars siccescit, altera liquida manet. Hinc opus indere utramque vna vasis (Bar-riques) infra duabus vel tribus aperturis perforatis, primum infra stupa clausis, dein aperiendis, vt per foramina in cisternas suppositas defluere syrpus possit, qui *Melassus* dicitur. Altera pars
ficca

ficca areham refert, magnisque doliis nominatim ex insulis Americanis transfertur in Europam sub nomine *Sacchari crudi, thomaei, rubri* (*Ph. Lond.*), vel Moscouade (Course Sugar Anglis, Sucre brut Gallis). Optimum hoc est, quod constat ex maioribus granis iisque claris et albidis, et siccum beneque a syrupo liberatum est; destitui et debet acore et emipyreumatico odore. Ex eiusmodi Saccharo crudo Sacchari albi $\frac{2}{3}$ parari possunt (DU HAMEL). Hinc cognoscitur crudum istud, quod transfertur, mox peioris mox melioris notae esse pro depurationis vario labore; saepe arenam rubram refert, qui color vilioris naturae esse indicat.

Depurandi illud in varios gradus artificium s. Rafinationem ample discutere hic non licet, ne prolixitate nimia peccetur, tanto minus, quam defectu terminorum aptorum, quo laborat Latinum idioma, obscuritatem remansuram praeuideam. Ad vltiorem cognitionem suppetias praeprimis attulit cl. DU HAMEL (*Art de rafiner le Sucre, Paris 1764. fol.*). Libram vero pro determinando inspissationis gradu commodam cl. DE MORVEAU descripsit in *Nouv. Mem. de l'acad. de Dijon; sec. sem. 1783. p. 52 sqq.* Depuratum hocce Saccharum

varias

varias formas habet, quarum vero visitatissima conica est, vnde *Saccharum pyramidale* dicitur; in hac primum persequenda commorabor. Coquitur nimis Saccharum crudum aheno cupreо in connubio aquae calcis, quo acidum nudum Sacchari absorbeatur, vel in connubio sanguinis bovilli vel albuminis ouorum, quo oleosis et mucilaginosis partibus exuatur, sub continua motitatione et despumatione. Transmittitur tum per pannum laneum intra corbem et post nouam coctionem transfertur in refrigeratorium vas, et ex hoc post refrigerationem in modulos argillaceos non vitreatos conicos apice perforato deorsum verso, primum linteо conuoluto et aqua humectato obturando, dein, ut syrupo exitus paretur, aperiendo. Iactura per syrapi effluxum refarcitur Saccharo contuso. Quo vero omni colore alieno Saccharum priuetur, oportet operire illud ad basin coni argilla macra pura aqua humectata, quod iteratur ad albedinem Sacchari iustum. Invertitur tandem conus, separantur fordes cultris et verriculo, et siccatur ope caloris omnino in hypocausto probe calefacto, quibus factis obuoluitur charta crassiori alba vel coerulea et funiculis obligatur. Multa nomina sortiuntur panes isti conici intercommer-

commercia pro gradu depurationis vario, quorum vulgatissima secundum puritatis ordinem haec sunt: Caffonade, quod Saccharum impurum adhuc manifeste est, Melis, Refinade, Saccharum Canariense, quod fere idem est, ac finissimum (*Sucre Royal*). In medicum usum Canariense praecipimus. Quo durius compactius magisque album est Saccharum, eo purius; solui quoque probae notae Saccharum omnino in aqua debet, nec mutare colorem et pelluciditatem solutionis aquosae mercurii sublimati, nec tritum sale ammoniaco odorem volatilem spargere.

Alia depurati Sacchari species est *tabulatum*, quod incrustat ahena, quibus faccharum coquitur. — Alia *Saccharum candum* vel canti. — *Saccharum farinaceum* (*Puderzucker*) venale vel est crudum illud follertius loco natali depuratum, vel faccharum antea solidum rudius contusum.

Saccharum candum obtinetur, dum faccharum depuratum sed non nimis inspissatum vasis eupreis ad latera perforatis, ut fila tensa transfigi possint, dein papyro extus ad claudenda foramina vestitis, inditur. Haece dum hypocausto primum frigido dein valde calefacto retinentur, circa fila crystalli

gene-

generantur, quarum color variat pro diuersa puritate, ita ut Saccharum candum album et vario gradu brunum profest. Pistores dulciarii loco filorum subinde bacillis ex Cinnamomo aliisque vtuntur et Saccharum ornatus causa variis coloribus imbuunt.

Syrupus, qui sub varia depuratione Sacchari ex modulis defluxit, gradu pariter puritatis differt, et nominibus diuersis distinguitur.

Saccharina materie insigni liberalitate natura hominibus prospexit, ut quae per regnum vegetabile ample distribuitur. Eam ex Borasso flabeliformi colligunt Jauani, ex Coco nucifera Indostani. Magno cum lucro in hunc finem succus Aceris saccharini elicitor terebrando in America septentrionali, nempe librae huius viginti libram vnam Sacchari bona notae suggerunt (Vid. praeter cl. KALM in *Kongl. Vet. Acad. Handl.* 1751. p. 147. A WANGENHEIM *Beytrag zur Forstwissenschaft*, p. 26. *Mem. d'agriculture de Paris* 1787. Printemps p. 49. SCHÖPF *Reise durch N. Amerika*, vol. I. p. 417. LOSKIEL *Geschichte d. Mission der evangel. Brüder unter d. Indianern in Nordamerika*, p. 92.), prout et aliae Aceris species Saccharum et si altero peius suppeditant.

Clarent

Clarent vel hoc nomine quaedam Juglandes et Betulae. Nouae Hispaniae incolae ex Aloës cuiusdam specie, sine dubio Agave americana, Saccharum parant. Eidem scopo inferuit succus florum Asclepiadis Syriacæ Canadensis; item Zeæ Mays. Imo nec boreales gentes destitui hocce oblectamento voluit benefica natura; docet id Heracleum Sphondylium, Kamtschadalensibus gratum, et Fucus faccharinus, Islandorum delicium. Passim iam in hoc ipso libro commemoratae sunt radices Saccharo foetae, vt Betae rubrae, Ciclæ, Sifari; item fructus multi, vt Caricae, Passulæ, Pruna, Juiubæ, Siliqua dulcis, Dactyli; nec non Manua, vt taceam alia exempla vegetabilium, quae alibi (*Opusc. med. vol. I. p. 160 sqq.*) cum ampliori recensitorum expositione proposui, et hic describendi negotium fugiens repetere dubito. Sacchari præsentia in regno animali in melle et lacte sese manifestat, nisi et hic vegetabilem originem arguas, vt morbosas opportunitates non attingam, prout in diabete. Addo, olea vnguinosa, butyrum, axungiam porcianam adeo, Sacchari speciem continere, sed variis notis a Saccharo Arundinis nostræ et melle diuersam (*SCHEELE in Vet. Acad. Handl. 1783. p. 324. sqq.*).

Appar. medic. Vol. V.

Ce

Aſt

Ast maximo lucro Saccharum ex Arundine saccharifera elicitor illudque praestantissimum. Eo quoque inuenio mellis, qui antea increbuerat, usus, mitifice tam in oeconomia quam in medicina decreuit. Reliquis stirpibus vel multo parcius inest Saccharum, vel aliis partibus nimis irretitum.

Saccharum illud purum, quod panis conici forma venditur, sibi essentiale est, albi coloris, durum, sed friabile, dulcissimi saporis. Particulae micantes, in fragmentis comparentes, crystalli sunt; apertius harum figura conspicitur in Saccharo cando, ut quae tetraedrae lateribus parallelis duabus oppositis latioribus, utroque extremo cuneatis. Soluitur cito aqua, praecipue tepida vel calida; difficultius autem et tardius spiritu vini, et sponte post aliquot dies in eo in crystallos iterum frigore coit. Igne liquatur, accensum carbonie candente autem ardet flamma coerulea, fumum haud ingratum spargente, intumescit, spumam agit relictis carbonibus. Iungit quaedam corpora alias non miscibilia, ut oleum destillatum cum aqua, et coagulum lactis impedit. Fermentationem vinofam item acidam aqua solutum calore adiuuante vel fermento facile subit.

Per

Per se in vase retorto vitro capaci destillatum leni sub initium igne, dein aucto, primo phlegma pallide flauescens odoris imbecillis et nullius fere saporis, parum aut nihil aciduli, edit; quod excipit spiritus flauus ex oleo admixto, dein flauo rubicundus, acidus mobilissimus, qui olfactus instar Armoraciae nares pungit et lacrymas proritat; sequitur pauxillum olei bruno nigricantis; remanente in vase retorto massa nigra inerte (NEUMANNS *Chymie* ed. KESSEL vol. 2. P. 4. p. 143. sg. CARTHEUS. *Mat. med.* tom. 1. p. 413. SCHRICKEL *Diff. cit.* §. 19-25.). Haec calcareae terrae pauxillum includit (V. SCHRICKEL *de salibus saccharinis*, p. 30. et praecipue HJELM in *Vet. Acad. Handl.* 1783. p. 227.). Quo impurius Saccharum, eo plus calcareae terrae continet (HJELM).

Acidi praesentia non obscure ex pluribus hancenus recensitis indicis elucefecit, ast combinatum adeo ante est cum aliis partibus, praecipue oleoso f. pingui, vt vera eius natura inde cognosci nequeat. Diuellendi acidum a reliquis compedibus artem edocuit ill. BERGMAN (*Diff. de acido sacchari* 1776. recus. in *Opusc. phys. et chem.* vol. 1. p. 251 sqq. *Act. nov. Vpsal.* vol. 2. p. 211.). Ad pingue,

Cc 2

quo

quo copulatur, destruendum, acido nitri opus est. Coquuntur nimirum leniter acidi nitri fortis sex ad octo partes cum Sacchari albi in puluerem redacti parte vna in vase retorto vitro. Dum acidum nitri aggreditur phlogiston Sacchari, erumpunt vapores rubri, quibus euanescentibus liquidum superstes in vas aliud amplum transfusum crystallos prismaticas quadrilateras graciles acidissimas refrigeratione format. Lixiuio si iterum duae ad quatuor partes acidi nitroſi adſunduntur, nouae crystalli generantur. Et hoc iterum artificium repeti potest ad nouum acidi Sacchari prouentum. Crystalli hae iterata ſolutione et crystallisatione depurantur, quod praecipue in crystallis ferioris collectionis fieri necesse est. Valde vero parca quantitate eliciuntur, ita ut, ad comparandam vnam partem ſalis huius, requirantur Sacchari tres et acidi nitri fortis triginta partes. In eſt hisce fapori acerimus, adeo ut earum grana viginti integrum aquae congium notabili acore instruant, grato tamen linguae, modo diluatur. Habet hoc acidum multa cum aliis acidis communia, multa tamen etiam diuersa, quae huius loci non eſt exponere. Addo modo illud calcem p̄ae omnibus aliis corporibus appetere, vnde necessitas aquae calcis in depurando

Saccha-

Saccharo cognoscitur. Hinc et nihil efficacius est ad detegendam calcem aquis solutam acido sacchari, nam soluti eius vel minima portiuncula mox in calcem reconditam fertur, et haec puluerem album indissolubilem cum eo efficiens fundum petit (BERGMAN *Diff. de analysi aquarum* in *Opusc. chem. et phys.* tom. I. p. 98.).

Sacchari acidum, quod cl. SCHRICKEL sicca distillatione prouocat, subiuncta rectificatione per argillam et concentratione per frigus, ut tenuior pars in glaciem vertatur (V. SCHRICKEL *Diff. cit.*), multis notis differt a priori, nam *hoc posterius*, quod fluidum est, syrumpum Violarum non rufat, cum alcali volatili in crystallos non redigitur, praeter alia. Dubitari nequit hoc longe plus olei superstitis continere. Eo tamen aurum soluere ope caloris valuit (*I. c.* §. 31.). Phlogisto magis depuratur, si digeritur hocce acidum carbonibus antea bene ignitis per aliquot temporis minuta pr. (PIEPENBRING in CRELLS *Chem. Ann.* 1787. vol. I. p. 157.). — Obiectioni acidum Sacchari Bergmanianum nihil esse, nisi acidum nitri phlogisto mutatum, iam obuiam iuit cl. BERGMAN (*Opusc. cit.* p. 274.). Argumenta, quibus nihilominus tamen eandem defendit cl. WIEGLEB (in

CRELLS *chem. Annal.* 1784. B. 2. p. 12. *sqq.* p. 100. *sqq.*) obtudit cl. WESTRUMB (*Kleine physikal. chem. Abhandl.* vol. I. p. 1. *sqq.*).

Idem acidum praeterquam saccharo multis aliis vegetabilibus partibus ineſt, vt succo citri, ribesfiorum, berberum, cerasorum, aceto, tamarindis, acido tartari, oleis vnguinosis, item variis aethereis, spiritui vini, radici Salep, Taraxaci, amylo, gummi variis &c. Quin ex multis animalibus partibus elici potest, vt ferico, lana, pilis, cute, tendinibus, albumine ouorum, sanguine coagulato, item etſi minori quantitate ex fibris muscularibus, glutine, fero coagulato, vitello oui, ichthyocolla, pinguedine, saccharo lactis rel. (BERTHOLLET in *Mem. de l'acad. R. des sc. de Paris* 1780. p. 120. *sqq.* SCHEELE in *Vet. Acad. Handl.* 1785. p. 23. *sqq.* item p. 26. *sqq.*). Occurrit et in calculo vrinario (BERGMAN. *Opusc. vol. I.* p. 254. SCOPOLI in CRELLES *Beyträge zu d. Annal. vol. 2.* p. 261.). Ex acido aceti, aëre puro et phlogisto conflari probabile visum est (WESTRUMB *l. c.* p. 48.). Nec differt acidum Sacchari ab acido Acetosellae (SCHEELE in *Vet. Acad. Handl.* 1784. p. 186. item WESTRUMB *l. c.* p. 51.). Quin coniectura enascitur, hocce acidum quasi funda-

fundamentale totius regni vegetabilis esse, a quo reliqua maiori tantum quantitate phlogisti admixti differunt (WESTRUMB in *Chem. Annal.* 1785. vol. 2. p. 520. *sqq.*).

Praeter acidum dictum Saccharo haud parum olei inest. Destillatione et separatione a reliquis partibus ex Sacchari vnciis sedecim olei drachmas decem cum aliquot granis obtinuit cl. SCHRICKEL (*I. c. § 24.*), vt tamen agnoscendum, aliquam olei partem spiritui adhuc inhaerere. Ad eius praesentiam demonstrandam hoc quoque facit, quod Saccharum igne ardet, item igne funditur, et spumescit sub strepitu, multis erumpentibus halitibus empyreumaticis et relicto carbone, et quod detonationem cum nitro super igne liquefacto subit.

Hisce oleosis partibus vna cum mucilaginosis quae combustae terram insipidam relinquunt, acidum ita obuoluitur, vt dignosci gustatu nequeat, sed in hocce connubio dulcedinis sensum linguae imprimat, prout acidissimum vitrioli oleum spiritu vini iunctum dulcescit.

Dulcedini subinde mucilago vel oleum crassius, gummi, resina, item multum aquae vel terrae in

corporibus istis, quae illa instructa sunt, supraque recensui, admistum est. Hinc effectus subinde sub eorum usu emergunt, quorum ratio non a solo, quod inest saccharo, deriuari potest. Non itaque perinde est, utrum Caricis, Glycyrrhiza, Melle, Saccharo lactis, an Saccharo ex Arundine saccharifera utaris. Quoniam tamen in hisce fapor dulcis per omnem reliquam miscelam dominatur et acidum Sacchari oleumque, quae in dulcibus primaria sunt, vbiuis praesto sunt, utique communio quaedam virium obtinet. Hic vero instituti ratio in Sacchari vulgaris uisce virtutibus considerandis subsistere me iubet. Cuius non illud modo pretium est, quod vel solum efficax medicina existat, vel multis medicaminibus conseruationis, gratiae, virtutis, causa adiiciatur, sed vulgare ciborum et potulentorum bene multorum condimentum constituat.

Quod ad diaeticum usum attinet, vix opus est, illud instar gulae irritamenti, dum solum capitur, vel cibis potulentisque cupediisque additur, commendare. Placet dulcedo infantili aetati praecipue, item senili plerumque. Foeminae vulgo magis ea delectantur viris. Ceterum consuetudo cum aliis linguam fortius afficientibus, ut Tabaco,
spiri-

spirituosis, taedium quoddam aduersus Saccharum
 parere solet, prout Saccharo facile assuefcitur, Sue-
 corum exemplo, qui vel optimo vino Rhenano
 Saccharum addunt. Saccharum sicut in mortario
 cum oleo tritum illud cum aqua combinat: ita et
 istud cibos pinguiores subigit; hinc non saporis
 vnicē causa, sed et in praesidium sanitatis pla-
 centis pinguioribus inspergitur, et vel acore,
 quem secum vehit, bilis corruptelam, quam pin-
 guia facile excitant, auertit. Mitigat quoque in
 mensis acrimoniam quorundam condimentorum,
 vt Armoraciae, vel Sinapi. — Nutriendi poten-
 tiam, quam multi Saccharo adscripsere, fateor me
 non exspectare a Saccharo, quo utimur, depurato.
 Facile quidem persuadeor, in insulis Americanis
 mancipiis reliquias, quae a secunda Sacchari succi
 ebullitione remansere, in victum cedere, eaque
 inde et pecora, quae crassioribus Sacchari foeci-
 bus faginantur, pinguescere: sed hisce reiectaneis
 multum adhuc nutritiae materiae inhaeret, quod
 ulteriori depuratione consumitur. Pugnat cum
 hacce facultate Sacchari vis relaxans, resoluens,
 saponacea, et quae acida continent, corpus potius
 emaciant, quam replent. Hinc et BOERHAAVIUS
 (*Elem. chem. vol. 2. p. 138.*) inter multas laudes,

Cc 5

quas

quas iure Saccharo tribuit, maciem illud inducere excessu, et vt iste quidem putat, olea nimis solvendo, innuit. Miror ideo, quod adhuc nuper cl. jo. HUNTER (*Treatise on the venereal Disease*, p. 354. sq.) Saccharum tanquam optimum restaurans in hominibus diuturno iejunio debilitatis vel mercurii vsa emaciatis proposuerit, et illud vel mel omnibus cibis potibusque tum addere iniunxerit.

Sunt, qui ex quotidiano isto Sacchari vsu detrimentum redundare in valetudinem insigne sustinuerunt, partim argumentis speciosis, partim experimentis incautius ad corpus humanum applicatis suffulti. Ad horum numerum refero HELMONTIUM (*Ort. med.* p. 463.), RAIUM (*Hist. plant.* tom. 2. p. 1279.), DOLAEUM (*Encycl. med. theor. pract.* p. 271.), LEONARDUM DE CAPOA (*Ragionamenti sopra incertezza delle medicina*, pag. 500.), auctorem quendam anonymum (in *Raccolta d'opuscoli scientifici e filologici*, tom. 6. p. 441. sqq.). Pars culpea connecta in calcem, cuius vestigia, siue ab Arundine ipsa repetenda, siue a praeparationis modo, inesse, negari quidem nequit, sed tam exigua quantitate, nisi casu fortuito vel arte male docta accesserit, vt nocere nullo modo queat. Obstat et timori
salubri-

salubritas, quam in variis morbis a calce extincta
vel aqua calcis experimur. Id agnoscendum, tanto
plus calcis inesse saccharo, quo rudius est. — Alii
acidum acre et erodens accusarunt, quod quidem
quam difficile ex Saccharo euoluatur, ex superio-
bus patet. Non igitur huic potestati sufficient
primarum viarum vires. Ridiculum vero plane
est, fermentationem arguere, spirituosum extrican-
tem, unde sanguis commoueretur et incaleficeret,
ventriculi inflammationes enascerentur &c. (V. de
hac accusatione *Raccolta d'Opuscoli scientifici l. c. p.*
459.) — Experimenta vermium varii generis, sc.
Lumbricorum terrestrium, Scolopendrarum marina-
rum, Sanguisugarum (REDI *Obff. de animalcul. viuis in*
corp. viv. p. 166 sqq.), necatorum Saccharo insperso
vel immersione in aquam saccharatam, qui in igno-
miniam Sacchari citant, non meminerunt, quam
diuersa hisce a nostra natura competit. Experi-
menta similis euentus cum ranis Saccharo consper-
sis, columba et duabus anatibus, quibus frustum
Sacchari intrusum, suspecta ore anonymi (*Raccolta*
p. 467.) essent, nisi repetitione haud ita pridem
publici iuris facta a viro grauissimo, cl. CARMINATI
(*Opusc. therapeut. vol. 1.*), et adiectis nouis expe-
rimentis robur obtinerent. Ita ranae ex puluere
drachmae

drachmae vnius Sacchari, quo conspergebantur, stupore correptae ex vniuerso corpore humorem limpidum emiserunt, crura protruserunt et in soporem delapsae quadraginta horarum circiter spatio occubuerunt, ponderis quinta parte amissa (*l. c. p. 111.*). Ex viginti granis Sacchari frustulatum ranae per os intrusis continuo sopor, irritabilitas deleta, et intra horam mors (*l. c. p. 113.*). Lacertis vulgaribus Saccharum adhuc nocentius fese exhibuit, ex paucis enim granis interne datis post soporem conuulsiones, intra quadrantem horae mors (*p. 114.*). Deleterium utriusque animalium generi extitit Saccharum intra cutem intrusum (*l. c.*). Columbis Saccharum vel siccum vel aqua solutum per os ad quinque scrupulos inditum, tumorem ingluuiet et post eius compressionem effluvium subflauum humoris per os, stuporem, contractionem crurum, conuulsiones et intra horam necem attulit. Gallinis autem ad vnciam aut sesquiunciam datum pepercit, nec nisi aluum liquidam reddidit, excepta una, quae nouem drachmis deuoratis reiecto muco ex ore et conuulsionibus accendentibus periit. Passeribus nullam vim intulit. Inter quadrupedia selectus factus est ouis, cui sex vnciae Sacchari per os datae nonnisi alui fluxum excita-

excitarunt, et canum, qui semilibram iejuno stomacho sine vlla noxa deglutierunt. — Sic itaque quo magis accederent animalia, quae experimenta subierunt, ad nostram naturam, eo minus vel nihil noxae ex Saccharo redundauit.

Nolo tamen ex hisce eam fiduciam concipi, quae metum omnis ex abusu poenae sufflaminaret. Nocet copia, vel mala opportunitate, ob insignem, qua pollet, attenuandi et soluendi liquida et fibras relaxandi potentiam, item ob acidi euoluti, etsi ad partem modo, irritandi neruos et musculos vim, quam debilitas insignis subsequitur. Fidem rei faciunt, inter alia documenta, experimenta nouissima cl. STARK (*Clinical and anatomical Observations with Experiments diaetetical and statical. Vers. Germ. p. 141 sqq.*) in illo ipso facta, qui per plures dies Saccharum ab vnciis quatuor ad octo, decem, sedecim, quin viginti cum aqua et pane ingessit, vnde qualibet vice paullo post fames, nausea, flatus, vlcuscula oris interni, gingivae rubrae et tumidae, pressione sanguinem fundentes, aliuis liquida, dolor et rubedo naris dextrae, stilleae aliquot sanguinis ex nare eadem, striae saturatae rubrae in scapula dextra. Fuit puer decem

anno-

annorum, natura mobilissimus et infirmitate stomachi et acido primarum viarum laborans, qui ex pyxide plura Sacchari albissimi frustula furtim ablata intra exiguum temporis spatum aude deuorauit, sed eo effectu, ut paullo post aegre se habens, dormitum quum sese contulisset, sequenti die mortuus in lecto reperiretur: corde maculis ruberrimis distincto et sanguine soluto (*REZIA IN CARMINATI l. c. p. 129. not.*). Probabilis saltim mortis causa, sub ista corporis conditione exstitit. In gelatinosam sanguinis partem haec ipsa resolutio sese praecipue exferere videtur, nam sub experimentis cum carne varia, cui Saccharum inspersum, diffluxit serum in notabile ponderis carnis residuae dispendium, ita ut sicca inde et dura euaderet (*Raccolta l. c. p. 471.*). Huc et spectat iactura ponderis quorundam minorum animalium, cum crassioris liquidi excretione (*V. supra p. 412.*). Et quum sanguini vena effuso adderetur Saccharum, feri multum ex cruore fecessit, et liquidior ille apparuit alio sanguine, qui istud additamentum non expertus fuerat (*CARMINATI loc. cit. p. 130.*). Nutritionem adeo turbari et emaciationem corporis succedere excessu obseruatur, qui effectus tamen quoad partem haud immerito quaeritur in vi Sac-

chari

-ontis

chari tonum ventriculi pulmonum et reliqui corporis relaxandi. Etenim abusus dulcium iam dum inter causas phthiseos pulmonalis locum obtinuit, nec minus euictum, male consuli aegris tussi conuulsiva vel alia obstinata correptis, ob debilitandi noxam, dulcium, sicuti et oleosorum et mucilaginosorum, protracta nimis exhibitione. Saccharo Theae vel Coffeae largius addito, noua debilitandi corpus causa hisce potulentis accedit. Alias molestias fermentatione in primis viis enata, qua flatus excitantur, creat; alias acore suo, qui licet non in acido puro Sacchari, sed reliquis Sacchari partibus laxius sociato, consistat, sensum tamen ingratum et ruclus acidos, dentium adeo stuporem induentes ciet, bilis vim in chylo praeparando eneruat, et sanguinem ipsum inquinat. Infestum igitur est virginibus chloroticis, infantibus rachiticis, hominibus hystericis et hypochondriacis, in quibus acidum iam antea dominatur et Saccharo nouum pabulum adipiscitur. Cariosi quoque inde fiunt dentes nigrique, praincipue si rimas egit tegmen eorum vitreum calidis ingestis vel Saccharo duro inter dentes comminuto.

Noxae tamen, quas fuscitat Saccharum abundantius ingestum, a corporum praeprimis habitu et

et natura deriuandae sunt. Documenta enim existant varia hominum, qui etiam si liberius Saccharo indulgentes grandaeuam tamen eamque vegetam senectutem attigerunt. Qui libram fere Sacchari quotidie per quadraginta circiter annos ingesserat DUX DE BEAUFORT, septuagenarius tamen mortuus sine villa vel viscerum vel dentium labe (SLARE'S *Observations upon Bezoar-Stones with a vindication of Sugars*, p. 59.). Ultra nonagesimi anni limitem peruenit COSTERUS, iurisconsultus Bataeus celebris, licet tantum Sacchari consumeret, ut quinque vel sex aliis hominibus sufficeret. Similia exempla suis nominibus reliquerunt FRIDER. HOFFMANNUS, BERGERUS, Prof. Witteb., LEYSERUS (TRILL. *Thes. medic. tom. I. p. 204.*), largiter et cibos et potus quoquis Saccharo edulcantes.

Iam vero pedem ad morbos transfero, quibus Saccharum haud mediocrem inter medicamina locum tueri patet. Saponacea eius natura in resoluendis spissis humoribus et coagulis quibusdam liquandis se se manifestat. Illustrat eandem impedimentum, quod lacti coagulum subituro ponit, item facilis cum oleosis, viscidis, miscela, nec non efficacia in fero dissoluendo nuper (p. 414.) proposita.

sita. In acutis febribus, et nominatim inflammatoriis, tenacem et stagnantem in minimis vasis sanguinem attenuat et liquat, quo scopo Saccharum in substantia, vel robis, syrupi, trochiscorum, variaque alia forma, mixturus, ptisanis, pulueribus admisceri solet. Sicque vices mellis, alias in hisce morbis frequentioris, agit apud hos, quibus eius sapor displicet, vel illud flatibus et torminibus molestum est. Acor vero, quem Saccharum recondit, tanto aptius illud febribus reddit, ut quo ipso calorem mitigat. Eadem soluendi praestantia pituitam, in tussi et asthmate vias aereas grauantem, subigit et ad screatus disponit. Ratio tamen similitudinem in inflammatoriis morbis, quam in hisce proxime dictis chronicis pectoris, habenda relaxantis Sacchari virtutis, qua impacta tenacius ipsa vasorum aucta flexilitate liberantur.

Ad causas diminuendas et remouendas, ex quibus calculus et podagra originem trahunt, par Saccharum iudicat LOBBIUS (*de dissolv. calc. p. 275.*). Nec errare mihi videor, si in hac re mellis vires in illud transferam. Calculus vrinarius aquae mellitae immissus bullas eiacylatur, mollescit et ponderis iacturam patitur. Ita calculis vel renum fa-

bulo afflitos libra circiter vna cum quadrante quavis hebdomade sub longa continuatione sumita egregie solatur (PRINGLE in PERCIVAL's *phil. medical and experimental Essays*, Lond. 1776. p. 232.). An acefcente sua natura, an fermentescibili, quae aërem fixum euoluit, Saccharum vel mel calculum vincit? Posterius suadet successus experimentorum cl. PRIESTLEY, PERCIVAL, HULME, aliorum, felix cum aqua aëre fixo impraegnata, et eidem malo opposita.

Mirifice etiam Saccharum valet in putredine et arcenda et superanda. De hacce eius potentia experimenta extra corpus humanum capta egregie cum iis in morbis conspirant. Integræ nefrendes cum Saccharo liquido sub coctione intinctæ et quasi in momento extractæ ita penetrari obseruatum, ut nunquam amplius putrescerent; et carnem ceruinam Saccharo ita condiri, ut summa aestate putredini resistat (BECCHERI *Phys. subterr.* lib. 1. sect. 4. cap. 1. p. 143.). Ita caro vitulina et alia vice cor veruecinum puluere Sacchari conspersum sub insigni ponderis dispendio immune a putredine mansit et exsiccatum (ANON. in *Raccolta d'Opuscoli scient.* tom. 6. p. 471. sqq.). Eadem immunitas contigit vitello oui (MESNY in cl. TARGIONI *Raccolta di Opuscoli*

Opuscoli medico-pratici, vol. 3. p. 32.) item sanguini recenti solutioni Sacchari indito (*l. c. p. 36.*). Exigua quidem Sacchari quantitas carni bubulae addita non sufficit auertendae putredini, fermentatione autem orta vincitur (*PRINGLE on the Diseases of the army, App. p. XL.* Auct. anon. libri *Essay pour servir à l'histoire de la putrefaction, p. 98.*) Iam mente facile conceipitur, cur Babylonii, HERODOTO teste, cadauera sua humana melle sepeliuerint. — Scite iam dudum notatum, Indos, quibus copia Sacchari suppetit, nunquam scorbuto corripi (*BECCHER l. c.*). Istius beneficio et tribuit cl. PRINGLE (*l. c. Append. item p. 334.*), quod hodie longe rarius leprae species ut ista Arabum, scorbutus putridus, dysenteria, febres pestilentiales et similes putridae indolis morbi compareant, quam olim, dum modum in vietu animali, praecipue salito, excedebat. Suasum ideo sagaci consilio ad scorbutum in peregrinationibus maritimis auertendum, ut nautis quotidie aliquid Sacchari exhiberetur (*MACBRIDE's experimental Essays, p. 181.*). Vere postea explorata praeclara eius vis antiscorbutica sub interno vsu est, prout gingivis hoc morbo correptis externa eius applicatio mediam attulit (*DE LONNES in Biblioteca fizica d'Europa, tom. 1. n. 7.*). Lucem accendit aliorum quorundam

Dd 2

celebra-

celebratorum nostro tempore contra hoc nialum vis, vt Malti infusi, Brässicae aceſcentis rel. quae ſingula perſuadent antiputredinosam Sacchari potentiam praecipue ſubtiliſſimo illo liquido acidulo deberi, quod ſub fermentatione Sacchari extricatur.

In ulceribus internis detergendis et confoliandis praeterea valet. Egregium eius exemplum praebet vis conſeruae Rosarum in phthiſi pulmonum exulcerata, de qua, quum alibi iam dixerim abundanter (*Appar. med. vol. 3. p. 167.*), nolo heic plura ſubiicere. Illustrant rem quae ſimilibus in vitiis externis comperimus.

Populari fere errore reprehenditur Saccharum, tanquam res vermium intestinalium generationi apud infantes fauens, vnde admoneri ſolent, vt ab eo abſtineant. Alia docent experimenta cum lumbricis terrefribus instituta, qui ipſi aquae faccharo impregnatae immersi, ad experimenta cl. REDI (*Obſ. de animalculis viv. in animal. viv. p. 166. 168.*), intra vnam vel duas horas interierunt, teste cl. CARMINATI (*l. c. p. 122.*) autem, qui videtur adhibuisse lumbricos humanos, modo intra ſex vel septem horas; quum tamen lumbrici terrefres in decocto

Abſyn-

Absynthii a 20 ad 30 horas, et in solutione Aloës 24 horas viuere pergerent (REDI). Suppar fait mellis aqua diluti efficacia. Idem deleterius effectus in lumbricis ex humano corpore deiectis sese exseruit intra pauca minuta pr. ex Saccharo insperso (CARMINATI l. c. p. 121.). In applicatione tamen horum euentuum ad similes in corpore humano reminiscendum est, humoribus primarum viarum, qui sese admiscent, non posse non eneruari vim Sacchari, nec posse puluerem Sacchari, qui aqua faccharata potentior est, ad sedes remotas, ubi vermes haerent, pertingere, item Saccharum, si ea copia assumeretur, ut ipsos vermes breui necaret, ipsis hominis verminosi valetudini vim inferre. Confirmatur id eo, quod nec vncia vna Sacchari aegro ingesti vermes eiiceret, nec molestias eorum manifeste leuaret. Quicquid sit, ne defraudetur Saccharum virtute anthelmintica vel in corpore humano sese manifestante, en exemplum pueri, qui confectione faccharata abundantanter ingesta copiam vermium alio deiecit (ANDRY *Generation des vers*, p. 164.); et aliud similis euentus ex Saccharo rosato, copiosius sumto, consequuti. Apte igitur et Saccharum vel mel commiscetur cum alia quauis medicina necandis vel expellendis vermbus dicata,

D d ; quod

quod, dum palato infantili gratificatur, simul ver-
mibus exitium parat.

Externa Sacchari applicatio variis quoque in
vitiis eximiae efficaciae est, quippe quum sub ista
abstergendi, discutiendi, consolidandi, item leuiter
stimulandi vim exerceat.

In aphthis dulcia quaevis penicillo affrica,
vel linctus sive collutionis instar adhibita, profunt
ad easdem separandas, mundandas et consolidandas.
Vulgo hocce fine mellita, praecipue mel Rosarum,
vsurpantur. Abstergit et aqua saccharata, syringa
auribus injecta, foetidum earum profluuum mu-
cosum et subpurulentum. Fissurae papillarum
mammarum saepe vel Saccharo cando vnicē insperso
sanantur. Idem praestat applicatio Sacchari cande-
lae flamma liquati et in cella deliquium passi (*LANG
Misc. verit. med. p. 24.*). Conducit quoque et
papillas Saccharo in spiritu vini soluto humectare
(*FIELITZ Erinner. Wundärzte zu bilden, p. 63.*).

Tentatur et in cicatriculis vel maculis corneae
delendis Saccharum candum, per calatum scripto-
rium exiguis portiunculis inflatum. Eius ope dis-
paruit macula in sinistro oculo post variolas super-
fites

stes (FR. HOFFM. *Diff. Sacchari historia*, p. 39.). Vi eius blande cathaereticae, quae duris et asperis Sacchari candi particulis debetur, sub applicatione exiguae durationis, quum a confluentibus lacrymis paullo post deliquescat, associat fese soluens et dissipans efficacia, quae pluris me iudice in hisce visus obstatulis facienda. Vtrumque scopum sibi praefixum habent, qui puluerem quandam terreum cum Saccharo miscent. Aufert et aliquando carnem ulcerum fungosam inspersus et antiseptica vi eadem emendat. Coryzam infantum discutere quoque folet puluis eius naribus inflatus.

Rarius alui stimulandae causa Saccharum clysmatibus adiicitur, crebrius longe mel. Placet tamen quibusdam additamentum Sacchari thomaei ad unam vel alteram unciam. In globulis faccharinis ad mechanicam per pondus pressionem simul respiendum est.

Corrigit aërem corruptum Saccharum carbonibus carentibus inspersum, hinc et pulueres fumales ruditer conquassatum ingredi solet.

Nec omittenda hic sunt commoda ista insignia, quae Saccharum in subigendis vel excipiendis qui-

D d 4

busdam

busdam medicamentis, item in gratia iis concilianda vel integritate conferuanda praestat. Ita radicis Jalappae puluis follerti tritura cum Saccharo indiget, quo resinofae partes rite subigantur, quod nisi fiat, molesta saepe tormina suscitat. Item camphora, quae sola in puluerem sese conteri non patitur, Saccharo adiuuanti facile obsequitur. — Sunt remedia, quae nonnisi uno vel altero grano subministrare opportunum est, vt Kermes minerale, flores Zinci, Vitriolum martis, Ipecacuanha: additamento igitur innoxio opus est, ne iactura fiat tam exigui ponderis, dum sicca forma exhibentur, quo quidem fine Saccharum commode eligitur. Imo casus incidit, vt medicamenta quaedam sicca, e. c. Opium, Tartarus emeticus, Ipecacuanha, minori quantitate ingerantur, quam cui definiendae vulgaria pondera sufficiunt, vt ad $\frac{1}{4}$, $\frac{1}{8}$ vel $\frac{1}{16}$ vel minorem adhuc grani partem: pro partitione aequali igitur Saccharo vtimur, quod connubium praestantis omnino est illo cum conchis preparatis vel alio quodam absorbente. — Admixto Saccharo omnino quaedam remedia a deliculis facilius feruntur, quae sola ob saporem repudiant; sed cavendum, ne gustui blandientes liberaliori dulcium vsu medicinam eneruemus vel vitiis ex abusu enasci solitis,

solitis, debilitatione, acore &c. (V. supra) nouas noxas afferamus.

Insignis insuper cohors in pharmacopoliis praesto est praeparatorum et compositorum, quae Saccharum vel gratiae, vel virtutis, vel conseruationis causa recipiunt, quorū Conseruae, Rotulae, Trochisci, Bacilli, Confectiones, Condita, Morfuli, Rob, Syrupi &c. quorum nomina dispensatoria pharmaceutica designant. Heic modo subsistendum est in recensione aliquot praeparatorum, quae Sacchari nomen in fronte gerunt, quae ante quam enucleantur, de Taffia primum dicendum est.

Consilium quidem datum est, ex Arundine faccharifera, octo vel decem diebus seruata, expressione succi praeuia, fermentationis ope speciem vini parandi (V. DUTRONE · LA COUTURE IN ROZIER *Journ. de Physique*, vol. 31. Septemb. p. 179.). Sed vix ultra consilium hactenus res processit. Quidni vero fieret cum lucro, quum fermentationem spirituosa facili hic succus intret. In insula Owaihi cereuisiae sapidae speciem ex Arundine hacce infusione parauit inclytus iste nauigator COOK, item Lupulo condidit: sed nautae bibere illam recusarunt (V. iter ej. tertium, verf. Germ. FORSTERI

D d 5

vol.

vol. 2. p. 195.). Ast ferius longe commodum redundat ex liquido spirituosis partibus longe magis foeto, ab Anglis RUM, a Gallis TAFFIA dicto; tanto magis aestimando, quum ex reiectaneis variis Arundinis Sacchari partibus elici queat. Vulgo spuma sub coctione ascendens, aqua, qua ahena abluta fuerunt, et fermentum clarum fermentationi committuntur, quae si initium ceperit syrapi melassi quantitas per partes additur, et fermentatione intra quatuor vel quinque dies continuata destillatio instituitur. Alii praferunt syrupum melassum cum duplo aquae dilutum et fermenti eadem quantitate, qua syrupus, mixtum, vnde lentior quidem fermentatio, sed destillatione egregius spiritus emergit, cui iterata destillatione plus virium impertiuunt (BROWNE's *nat. Hist. of Jam* p. 132.). Plurima huius spiritus pars in insulis Indiae occidentalis paratur. Prout spiritus frumenti, item uvarum, multis modis discrepare potest: ita et hicce ex Arundine saccharifera, colore, sapore, odore, virtute. Quae diuersitas multas inanes disceptationes proximis hisce annis, dum Gi. Guaiaci Taffia folium commendabatur, fuscitauit (Vid. *Appar. med.* vol. 3. p. 422.). Hinc SPIELMANNUS (*Pharm. gener.* P. 1. p. 203.) adeo discrimen facit inter Rum et Taffiam.

Taffiam. Multo plus follertiae in eo rite confi-
ciendo Angli adhibent, quam Galli. Gallis obiici-
tur, eos negligere sollicitam vasis destillatorii post
encheiresin purgationem, aquam non satis puram
et limpidam eligere, instrumenta eorum variis vi-
tiis laborare, e. c. alembicum eiusque orificia non
satis ampla esse, ductus quoque angustos nimis
esse, nec satis circumuolui (*Essai sur les Rumeries*
par MICHEL SOLEIROL. Conf. *Nouvelles de la Republi-
que des lettres et des arts* 1787. n. 37 et 40.). In ins-
ulis Canariis licet prouentus Sacchari largus sit,
spiritus tamen ibi paratus nonnisi ingratum sapo-
rem odoremque pae se fert (*TENCH's Narrative of*
the expedit. to Botany bay, p. 25.). SPIELMANNO (*l. c.*)
eius vnciae viginti sex spiritus rectificati vncias septen-
decim, et hae Alcoholis octo dederunt. Spiritus
hicce omnes colligit probi spiritus vinosi vires, et
in itineribus praecipue marinis nautis ad scorbuti
insidias arcendas et neruos refocillandos propina-
tur. Quod pro menstruo Gummi Guaiaci electus
fuerit, opportunitate loci primum videtur esse fa-
ctum; nihil enim in eo reperio, quod symbolam
ad curationem arthritidis afferre posset. Praestare
menstruum aquosum alibi monui (*V. Appar. med.*
l. c.).

PRAEPA-

PRAEPARATA ET COMPOSITA.

SACCHARUM HORDEATUM *Ph. Brunsv.* p. 312.

Supra de eo iam egi (sub Hord. p. 3817).

SACCHARUM PENIDIUM *Ph. Brand.* p. 156. *Ph.*

Brunsv. p. 313. Ex Saccharo ad iustum densitatem cocto, dein in tabulam marmoream oleo Amygdalarum perunctam effuso. Hoc tum, postquam induxit nonnihil, vna suspenditur et repetitis vici bus manibus amylo conspersis in longitudinem extenditur. Dein in bacilos contortos crassitie fere apicis digitii minimi redigitur, hinc inde convoluendos. Amylum, quod sub eius tractatione Saccharo impingitur, nutritiam aliquam facultatem illi impertit. Infantibus recens natis aqua emollitum intra linteum tenue fugendum praebetur.

SACCHARUM ROSATUM TABULATUM *Ph. Würt.*

p. 165. Saccharum aqua Rosarum solutum et ad spissitudinem crassiorem coctum miscetur cum pulvere Rosarum rubrarum. Saporis causa pulueribus salinis adiicitur. Commendatur et in phthisi a MONTANO, VALERIOLA, FORESTO, RIVERIO (*Oper. med. cap. 7. de phthisi* p. 317.), quae laus vero iustius conserua Rosarum sibi vindicat.

SACCHA-

SACCHARUM PERLATUM f. ROTULAE MANUS
CHRISTI *Ph. Würt.* p. 164. Mater perlarum exci-
pitur Saccharo in aqua Rosarum soluto. Super-
fluum et obfoletum.

SACCHARUM VIOLATUM CANDISATUM *Ph. Brand.*
p. 156. Succus Violarum Saccharo exceptus. Idem
valet iudicium.

GLOBULI MOSCHATI ALBI *Pharm. Würt.* p. 99.
Parantur Saccharum, Amylum et radicem Ireos
Florent. ope Gummi Tragacanthae in rotundam
figuram compingendo. Odoris causa, Moschi et
Zibethi tantillum additur, qua de causa, ignoro;
etenim suppositorio tantum destinantur, vnde pro
diuersitate aetatis globulus vel maior vel minor
desideratur oleo obliniendus. Pondere potius
quam stimulo peculiari receptorum aluum mouere
existimo.

GLOBULI MOSCHATI RUBRI *Ph. W. l.c.* Dicta
tinguntur lacca pictoria addita. Sic ridiculum,
quod globulis albis odoris gratia allitum fuit, in
rubris coloris studio augetur.

PANICVM.

PANICVM.

LINN. *Syst. veg.* p. 89. *Gen. pl.* p. 32.

545.

Pharm. MILII Semen.

Panicum miliaceum; panicula laxa flaccida, foliorum vaginis hirtis, glumis mucronatis nervosis LINN. *Syst. veg. l. c.* Milium semine luteo et albo C. B. Icon: REGNAULT *Botan. Le Millet.* Annum, Indicae originis.

Panicum Italicum; spica composita, spiculis glomeratis fetis immixtis, pedunculis hirsutis LINN. *Spec. pl.* p. 83. *Panicum italicum* f. *panicula maiore* C. B. Icon: RUMPH. *Herb. Amb.* p. 202. tab. 75. fig. 2. Annum, crescens in Indiis.

Vt̄raque stirps in Germania quoque in agris bene stercoratis crebro colitur, e. c. in vicinia urbis nostrae, nec, nisi frigidior aestas incidat, maturationem semen respuit. Cultura fit semen causa, quae hodie rarissime instar medicamenti praecipiuntur.

Milium creditur Graecorum (THEOPHRASTI et DIOSCORIDIS) Κεγχρος fuisse.

SEmen

SEmen *P. miliacei* ouatum, subcompreßum, nitidum, lineam dimidiā circiter longum, corticis vel nigricanti bruni vel albi vel flauescentis, intra quem farina alba subdulcis. Eligitur semen pallidius, alterum enim durius est. SEMEN *P. italicī* subrotundum et minus est, extus flauescens. — Antequam ingeratur, mōlē ope decorticatur tumique granula refert rotunda subpellucida. Omitto studio mentionem usus cibarii apud priscas et a nobis remotiores gentes, vtpote non satis certi. Apud Italos, Gallos, Hispanos, item hinc inde in Germania, non infrequens est, forma praecipue pultis aqua vel lacte coctae. Nam bene nutrit, nec saporis ingrati, infantibus adeo placentis. Butyrum superfusum vel liquatum item additamentum vini gratius hoc ferculum reddit. Syluani, qui carbones parant et arbores secant in agro Tridentino fola pulte se aluerunt cum lacte illa vescentes, nec alio alimento se posse perdurare edixerunt (MATTHIOL. in DIOSCOR. ed. c. B. p. 328.). Panis quoque in Italia inde coquitur, qui vero vnius diei aetatem habens aridus ingratus, difficilis digestu, pauci alimenti, describitur, Lombardis visitatus (CRANZ Mat. med. et chirurg. vol. I. p. 5.). Calidus magis arridet: ita per plateas in Italia circum-

circumfertur, exclamando: Pan di miglio, caldo,
caldo (MATTHIOL.).

Olim frequentius ptisanae materiem medicis
praebuit aqua coctum, quando demulcendum fuit
praesertim, si quod vrinae vitium vel alii fluxus
adfuicit. In dysenteria ideo tepide et copiose po-
tum prodest (*Comm. Nor.* 1733. p. 43.). Nec ca-
ruit applausu WERLHOFII (*I. c.* p. 133.), qui sibi
et aliis medicis Hannoueranis familiare decoctum
pro ptisana fuisse indicat. Dubito, an praerogati-
vam quandam pree Hordeo vel Auena habeat.
Mucilaginosum, quod inest, blande simul aluum
constipat.

ORYZA.

O R Y Z A.

LINN. *Syst. veg.* p. 283. *Gen. pl.* p. 177.

546.

Pharm. ORYZAE Semen.

Oryza satiua; LINN. *Spec. pl.* p. 475. CATESBY'S *nat.*

Hist. of Carol. vol. 1. p. 14. tab. 14. Melius de-
pictam eam fistunt JO. MILL. in *Illustr. Syst. sex.*
et REGNAULT *Botan. Le Riz.* Stirps annua, cu-
ius patriam subdubitanter LINNEUS Aethiopiam
assignat. Colitur in India orientali, in primis
circa Cantonum et in Japonia copiosissime; nec
minus in Americes Carolina australi. Ibi a.
1696. exigua eius portio, ex itinere ex Mada-
gascar residua, sata lucrum summi momenti in-
colis attulit PENNANT'S *arctic Zoology*, vol. 2. p.
361.). Succedit quoque cultura egregie in
Hispania, item per multas aetas circa Vero-
nam in ducatu Mantuano (*Lettres ecrites de Suisse*
d'Italie &c. vol. 1. pag. 306.), ditione Abruzzo
regni Neapolitani (*DELFICO memoria sulla coltiva-*
zione del riso nella provincia di Terano, p. 14.) nec
non in Hungaria (BRUZ *Diff. de Gramine Mannae*
p. 10.).

Appar. medic. Vol. V.

E e

Dele-

Delectatur locis inundatis, vnde seri vulgo solo depresso paludoso, vel, quando aquae spontaneus commeatus deficit, haec arte illuc aliunde deriuari solet. Quam necessitatem quidam principes in lucrum suum verterunt, adeo ut sumtus pro aqua sibi instar redditus publici Oryzae erogandos cultoribus iniunxerint, exemplo Ducas Mantuani et Regis Neapolitani. Ita et documentum exstat, quod solum Oryzae destinatum maiori pretio censeatur, quam aliud (e. c. in Mantua). Attamen iam dudum compertum, bene quoque vigere Oryzam in campis, qui in altis et montosis locis siti sunt. In Jaua aliisque locis, vbi flumina commodum inundationis non praebent, eiusmodi stationes eligi iam edocuit RUMPHIUS (*Herb. Amboin.* vol. 5. p. 198.). Idem in Japonia fit (THUNB. *Fl. Iap.* p. 147.). In Cochinchina quoque Oryza in montibus crescit, nec irrigatione eget, quae ipsa in insulam Franciae (Isle de France) translata et simili modo tractata optime ibidem viguit, donec ex oscitantia instar alius, quae aquosa loca desiderat, coleretur, indeque omnino periret (*Notice sur la vie de Mr. POIVRE*; item AUBLET *Hist. des plant. de la Guiane Franc.* tom. 1. p. 320.). Posset inde concludi duas diuersas Oryzae varietates primarias obti-

obtinere, alteram humido solo, alteram sicco destinatam, nisi et exemplis aliis constaret, quasdam stirpes amphibiam quasi vitam vitam degere, v. c. Valerianam officinalem, Sisymbrium amphibium rel. Vtique Oryzae, vt reliquorum cerealium, plures extant varietates, quae ipsae vero neglectae a tantum non omnibus, qui in regionibus, ubi culturam eius exercere clima permittit, peregrinati sunt. Vberrimus in iis recensendis RUMPHIUS (*l. c.*) est, adeo conspicuis, vt et indigenis nominibus diuersis distinguantur. Alia praecox est, alia serotina. Est quae culmum gerit humana statura maiorem, nec ante nonum vel decimum mensem maturescit. Differunt et magnitudine aristarum, colore aristarum et glumarum, qui in quibusdam fuscus vel nigricans cum granis duris et gracilibus est. Granum quoque mox maius, mox minus est.

Maxime autem vulgare, Oryzam locis inundatis colere. Solet primum feri locis eleuatoribus, dein, postquam ad magnitudinem circiter pedis creuerit, effoditur, et in series solo bene stercoreto disponitur iis in locis, quae fluxui et refluxui maris obnoxia sunt. Agris a mari remoti-

ribus vel eleuationibus aqua prospicitur vel fossis illam illuc deduentibus cum aggeribus, qui aquam stagnantem retinent, vel machinis peculiaribus, quae eam attollant vel amphoris, quarum agitatione aqua contenta diffunditur. Solent et fossae circa agrorum oras fieri, quas cymbis suis transmeant, et in quas Oryzam iusto tempore resectam transferunt. Ita contingit, ut idem solum, quod cereale egregium fert, simul commodum piscium domicilium euadat, quibus messores, tempore messis, degunt. Maturatione seminum facta culmi praescinduntur, et in exiguo fasciculos colligantur. Quo autem grana a suis paniculis separantur, calcantur fasciculi ab hominibus, vel, vbi occasio fert, vris, et ut glumis suis grana exuantur, ea ligneis tignis imposita contundunt (Conf. de hisce RUMPH. l. c. item OSBECKS *Ostindiska Resa*, p. 218. et TORÉN's *Resa* in libro eod. p. 352.). Sunt qui recens collecta semina aqua feruida persundunt et iterum ad solem exsiccant, vnde Oryza indurescit, et diutius seruari potest, sed fusca simul euadit et saporem ingratiorem adsciscit, prout in Coromandeliana fit. Omnibus praefertur Japonica, quae altissimae statura magna et rotunda grana complectitur, pinguis contactu, dum coquuntur.

Tenta-

Tentatur Oryza aliquando morbo, ab Italio Carolo dicto, qui aliquando flirpem tenellam corripit, et in hac foliis iusto grandioribus et obscuris sensim flauescentibus et arescentibus distinguitur, in adulta autem paniculam ipsam afficit, ita ut glumae vel vacuae vel exigua modo substantiae parte instructae conspiciantur. Ratio coniecturis modo hactenus nititur (Conf. *Nuovo Giornale d'Italia*, tom. 3. p. 73. sqq.). — Alius Oryzae cultoribus hostis est Emberiza oryziuora L., quae in insula Cuba deuastat grana, quum adhuc lactescunt, indeque ita pinguescunt, ut vix volatus exercere possint, et sclopero tactae saepe crepent sub ipso lapsu. Hacce strage facta avis ista in Carolinam per tres hebdomades transmigrat, sed foemina vnice (Vid. PENNANT's *arctic Zoology*, vol. 2. p. 360.).

Nobis in usum cibarium afferuntur Oryzae nomine SEMINA, gluma sua flauescente exuta, oblonga, compresso conuexa, vtrinque obtusa, duas circiter lineas longa, alba, semipellucida, corculo ad latus baseos instructa, subsulcata. Sapore et odore omni destituantur. Masticata subdura quidem initio, sed facile dentibus confringuntur. Coctione cum aqua mollescunt in pultem, et aqua lactescit et mucilaginosa euadit.

Ee 3

Per

Per totam Indianam orientalem, praecipue regnum Sinense, Persiam, Japoniam, cibum sistit maxime visitatum. Pani inde pinsendo Oryza non apta est, nam vix intumescit pasta etiam si fermento addito, et cocta panem modo duriusculum, ore difficulter solubilem, praebet. Vicibus tamen panis fungitur locis, vbi colitur, dum nimis exigua aquae parte, circiter dupla, coquitur in pultem, quae tam tenax euadit, ut digitis, vel, ut Sinenses faciunt, bacillis teretibus arripi possit; quae ipsa inter reliquos cibos loco panis editur. In Carolina similiter in pultem tenacem cocta instar panis est (*SCHÖPF Reise durch einige Nordamer. Staaten, vol. 2. p. 246.*). Nigritae, qui colendae Oryzae operam dant, ea fere tanquam unico alimento utuntur, et ruricolis anterioris Carolinae praecipuum est. Parant ibidem quoque vel ex Oryza sola vel eadem cum Zea commixta placentas tenues (*I. c.*). Et sponte intelligitur, additamento vel præparatione varia gratiore inde et vel varietate sua placentia fercula a gentibus, quibus Oryza in deliciis, excogitari. Credi inde posset, nutrimentum esse maxime commodum. Attamen compertum illam nonnisi debilem subire fermentationem, si modico calore cum aqua retinetur

(PERCI-

(PERCIVAL's *Essays medical and experim.* vol. 2. p. 42. sqq. nec non *Philos. med. and experimental Essays*, p. 180. sqq.), item non arcerē putredinem carni admistam, imo ipsam Oryzam diuturniori mora putrefascere, vt ex foetore declaratur. Accusatur et difficilioris in stomacho concoctionis, et nigritae, qui in insulis Indiae occidentalis eiusdem plantatione occupantur, sub eiusdem esu extenuari et minus habiles operae euadere feruntur (PERCIVAL l. c.). In comparatione eiusdem cum radice Salēp vel dupla quantitate minus ista nutrit, quam haec, et in itineribus maritimis postponenda huic ideo, quod pabuli ignis plus requirit, diuturniore coctionem et aquam dulcem (LIND on *Diseases in hot Climates*, p. 338. sqq.). Coecitatis adeo causam Oryzae eiusque calidae esum arguerunt frequenter in India (BONT. *Hist. nat. et med. Indiae orient.* p. 7. 31.), a qua vero culpa iure liberatur. Vapores ex pulte Oryzae surgentes, si alluerent oculos constantius et repetito, accusari omnino possent: sed quidni eiusdem vitii rea faceremus quaevis fercula calida, quae quotidie tamen inter prandia mensis impune imponuntur. Nocentiores vifui reputandi vapores ex vernice acri, qua Sinen-ses vtuntur, ex fimo humano, ex suffimento ligno-

rum in honorem deorum accensorum, excessus demum in venere. Plerisque tamen in regno Sinensi coecis malum hocce connatum est, vnde vel alia causa, nos hactenus latens, sectanda est (Vid. OSBECKS *Resa*, p. 200. 359.).

Ex Oryza quoque cereuistiae species parari potest, caput pariter inebrians (BONT. *I. c.* p. 8.). Japonenses illam Sacki vocant, et eam inter prandia calide bibunt. Recens alba est, sed cadis seruata bruna euadit. Temulentia, quam excitat, breui disparet, ast non absque cephalalgia relida (THUNB. *Tal om Iapanska nationen*, p. 27. sq.). — Spiritum inflammabilem, Arrack dictum, ex Oryza destillari, vulgo quidem existimatur, verum falli eos, hoc vel haud exiguo arguento est, quod Sinenses, qui hocce cereali abundant, illum non praeparant. Transfertur contra ad illos vel ex Goa vel Batauia Jauae metropoli. Quomodo ibidem fiat, hactenus latet. Nec extra dubium omne positum est, ex Oryza, Arundine saccharifera et nucibus Cocos parari. Ita quidem cl. OSBECK (*I. c.* p. 98.) ex incolae Batauiensis narratione. Arrack Goënsse albidius est et debilius, Batauiense saturatius, sed mox fortius mox debilius, vnde valor

valor valde variat. Inclaruit in primis potulento notissimo Punch, de quo iam alibi iudicium tuli (Vid. *Appar. med.* vol. 3. p. 277.).

Etsi non quotidianum apud Europaeos, vt apud Indos, ferculum Oryza efficiat, nec nos, vt in China fit, mendicantibus loco oboli vel frusti panis cochleare coctae Oryzae praebemus: ad vulgatoria tamen alimenta in Europa pertinet. Iu scula enim multiplicis generis inde fiunt, dum aqua vel lacte coquitur, item carnis aliorumque aditamentum recipit, vel in pultem emollitur, vel placentae, farcimina rel. varia arte inde emergunt. In farinam contrita nouam concedit ferculorum varietatem, forma vel solidiori vel fluidiori instrutam, in qua eminent species pulpae (Creme), ex hacce farina, succo Cerasorum, Cinnamomo et Saccharo coctae (Vid. si placet exempla horum omnium in *Hjelpreda i hushællningen*). Adeo vero de salubritate Oryzae pro vsu cibario conuicti sunt plerique, vt non dubitent, ipsis aegris istam pro vulgari cibo offerre, et in nosocomiis tantum non omnibus in tabula receptorum ciborum exstet. Scrupulos tamen contra hanc praerogatiuam movent incommoda varia, quorum supra memini.

Ee 5

A mu-

A mucilaginosa eius natura iure exspectes, ptisanæ vel alia forma conducere oboluendo et alvum nonnihil constipando in diarrhoea et dysenteria, demulcere acres humores, resarcire dispensum glutinis naturalis in cauis, defectum nutritionis adiuuare in tabidis. Diffido fateor vi antiscorbuticae, quam illi enucleatus tribuit cl. BISSET (*Treatise on the Scurvy*, p. 81. sqq.), quum Sacchari nautis quotidie exhibiti, vini Malagensis, aquae dulcis elixirio vitrioli acidulatae, simul mentio fiat, de quibus omnibus vis in scorbuto subigendo euicta est.

ANDRO-

— —
A N D R O P O G O N.LINN. *Syst. veg.* p. 758. *Gen. pl.* p. 540.

547.

Pharm. SCHOENANTHI f. SQVINANTHI f.JVNCI ODORATI *Pharm. Lond.* *Herba.*

Andropogon Schoenanthus; paniculae spicis coniugatis ouato-oblongis rachi pubescente, flosculis sessilibus arista tortuosa LINN. *Spec. pl.* p. 1481.
Juncus odoratus aromaticus c. b. Comachee pillee BROWNE in *Phil. Transfatt.* vol. 23. p. 1251.
Kodipullu RHEED. *Hort. Malab.* vol. 12. p. 107.
tab. 27. PLUKENET *Almag.* *tab. 119.* *fig. 2 et tab. 190.* *fig. 1.* *Schoenanthum amboinicum* RUMPH.
Herb. Amb. vol. 3. p. 181. *tab. 72.* *fig. 2.* Perenne.
Incola Indiae orientalis, Arabiae, Zeylonae, insularum Moluccanarum. Copiose crescit in desertis utriusque Arabiae; circa Limbo Arabiae petraeae portum pro translatione in Aegyptum colligitur.

Nolo disquirere, an sit Σχοινός DIOSCORIDIS et
 GALENI, Σχοινίς αὐθός HIPPOCRATIS, *Juncus odoratus* PLINII, Adhar et Adhir ARABUM, *Squinanthum*

VARRO-

VARRONIS, tanto minus, quum exoleuerit eius existimatio feriori praxi.

HIERBAE nomine seruantur in officinis fasciculi circiter pedales diametri duorum pollicum ex culmis teretibus substriatis, flavis, quibus folia aliquot vaginantia canaliculata alternatim adhaerent, medulla fungosa farctis et subinde paniculas una ferentibus, vinculo iunctis. Sapor illi inest amaricans aromaticus, odor fragrans. Ex Natolia Massiliam transferri solet. Aqua destillata pauxillum olei essentialis flauescentis, fragrantis et valde acris, fuggerit; quod remanet acerbum amaricans et subacre decoctum praebet (LEWIS *Mat. med.* p. 329.). Extractum spirituolum grate aromaticum et amaricans est. Sic quidem plura indicia suppetunt, efficacia sua non destitui: ast in obliuionem incidit apud nos ob copiam multorum virtute similium. Arabibus ob gratiam odoris hodie magni fit, et existimatur inter herbas pretiosas aromaticas et suaveolentes a regina Arabiae Salomoni dono datas haec una fuisse (HASSELQUIST's *Resa* p. 535.). In insulis Amboina et adiacentibus magis aromatis instar pro condiendis cibis quam medico scopo adhibetur, et inferior quidem herbae pars ventricosa et

et radici vicina. Piscibus ea coctis gratum odorem impertit simulque ab ea vis stomachica exspectatur (RUMPH.). Lotium sudorem et menstrua pellere in non assuetis, in aliis nonnisi maiori copia legitur (l.c.). Decocta cum radice gargarisma utile praefstat in odontalgia et tumore tonsillarum ex refrigerio concepto (IBID.). Ad coercendum et delevendum fungum cerebri ex vulneratione inspersus pulvis commendatur (MARCHETTIS in Obs. et Act. Berlin. Decas 2. vol. 1. p. 103.). Hodie vix nisi pro additamento THERIACÆ ET MITHRIDATII in officinis praefsto est.

548.

*Pharm. SPICÆ INDICÆ f. NARDI Radix vel
NARDVS INDICA f. SPICA NARDI.*

Andropogon Nardus; paniculae ramis supradecompositis proliferis LINN. Spec. pl. p. 1482. Cf. EJUSD. Flor. Zeyl. sub Laguro p. 18. Calamus odoratus Matthioli c. b. Stirps crescens in India orientali, nominatim Zeylona.

Sub nomine praefixo coram est fasciculus digitum circiter longus, constans partim ex filis tenuissimis, pallide brunis sursumque versis, quorum quaedam

quaedam varie irretita, vt pristina functio vix cognosci possit, alia tamen ita disposita, vt culmorum et baseos foliorum vel vaginalium reliquias esse appareat; partim ex fibris variis radicalibus, multipliciter flexis, ferrugineis. Prouenisse hasce ex capite trunci radicalis crassioris probabile est, cuius situm fouea filamentosae massae impressa indicat; digiti crassitatem huic truncō adscribit, post POMETUM (*Hist. generale des Drogues*, p. 187. Cfr. Fig.), BERGIUS (*M. m. veg.* p. 324.). Rarissime autem relinquitur. Subinde plures eiusmodi fasciculi s. capita iuncta sunt.

Odor huius graueolens, vix meo iudicio gratus, sapor amaricans subausterus. Gratiор est odor herbae adnascientis, quam fibrarum radicalium. Deseruit omnino hodiernam praxin, dum olim (V. e. c. GALENUS *de compos. medic. per loca lib. 8.*) bene multis praeparatis addita exsttit, et in magna varietate morborum diuersae plane naturae adhibita fuit instar stomachici, nephritici, emmenagogi re. de quibus nihil certi constat. Plus quam duae tertiae Spicae Indicae ex indissolubilibus partibus constat, reliquum tam resinosaе quam gummosaе naturae est cum pauxillo olei aetherei, a quo odor depen-

dependet. Antiquitus et oleis et vnguentis ob gratum odorem admixta Spica Indica fuit, quorum tam sacra historia quam profana mentionem facit. Saltim ad multorum sententiam oleum sive vnguentum nardinum nomen petuisse ab hacce stirpe creditur. Spectant huc loca HORATII "cur non — Assyria Nardo potamus vncū?" (HORAT. *Carm.* l. 2. n. 11. ed. BENTL. p. 115.); "Perfundi Nardo iuuat et fide Cyllenen leuare duris pectora follicitudinibus" (ID. *ibid.* 13. p. 326.); "Nardo perunctum, quale non perfectius meae laborarint manus" (ID. *Epopon.* 5. p. 307.). — TIBULLUS autem ita canit "Illiū puro destillent tempora Nardo" (*Lib. 2. Eleg.* 2. p. 230. edit. WETTSTEIN.); "Iam dudum Syrio madefactus tempora Nardo" (*l. c.* p. 348.). Sed vereor, ne a quibusdam reprehendar, si diutius in hisce viretis commorer. Fuit vnguentum hocce consistentiae fere fluidae (DIOSC. *M. m. lib. 1. cap.* 75.); idque apud veteres duplex, vnum incompletum, paratum ex oleo omphacino (h. e. oleo expresso ex oliuis iunioribus), Junco odorato, Callamo, Costo atque Nardo; alterum completum cum vel sine foliis Malabathri, ex oleo omphacino, Junco odorato, Nardo, Amomo, Myrrha, Opolbalsamo (Conf. DIOSC. *l. c.* et PLINIUS *lib. 13. cap. 1.*).

quod

quod igitur ob additamentum Opopbalsami non potuit non valde charum esse, et vix nisi magnatum reficere nares. Apud orientales populos pariter Nardus summa in existimatione fuit (Vid. SALOMONIS *Cantic. cap. 4. vers. 13. 14.*). Fuitque vnguentum nardinum, quo vel se ipsos vel hospites et conuiuas perungebant. Hunc imitata morem MARIA, Martha et Lazari soror, pedes Christi (e. c. JOANNIS *Euang. cap. 12. vers. 13.*) vnguento pretioso perunxit (*Conf. LUC. cap. 7. v. 38.*). Subfuit in hocce vnguento saepius fraus, ita ut viliora vnguenta eius nomine vendita fuerint, prout GALENUS queritur Neapoli paratum nomine modo conuenire cum eo, quod in Asia suo tempore confectum (Vid. GALEN. *method. med. lib. 11. cap. 16. p. 418. ed. RICCI;* item DIOSC. *l. c.*).

C. ACOTY-